

UTL AT DOWNSVIEW



D RANGE BAY SHLF POS ITEM C
39 10 11 03 13 004 4

DR
571
05


11 i.e. Onbir, Nisān inqilābı

PLEASE DO NOT REMOVE
CARDS OR SLIPS FROM THIS POCKET


UNIVERSITY OF TORONTO LIBRARY

288

10/55







Digitized by the Internet Archive
in 2010 with funding from
University of Toronto

2



حرکات اردوسی قوماندان اکرمی برنجی فریق محمود شوکت پاشا

۱۱ نِسَانِ اِنْقِلَابِی

۳۱ مارت اختلال عسکریسی۔ حرکت اردو سنک حرکاتی۔

۱۱ نِسَانِ مظفریتی۔ عبدالحمیدک خاکی

محرری :

۱۱ نِسَانِ اِنْقِلَابِی

طابع و ناشری :



کتابخانہ عسکری۔ ابراہیم حلمی

۴۶۔ باب عالی جادہ۔ ۴۶

۱۳۲۵



کتابخانه اسلام و عسکری

تجار زاده ابراهیم حلمی

DR

571

0.5

مطبعة آرتین آصا دوریان و مخدوملری

مقدمه

۱۱ نيسان انقلابی، تاريخ عثمانينك الكمهم والكارلاق
بر صحيفه سنی تشکيل ايدر .

سلاطين عثمانیه اره سنده وطنی الكزیده خرابی به
سوق ایدن عبدالحميد ثانی نك ساحة سياسیادن قالماسی،
افكار منوره ملتك ظلام مدهشه تعصبی سونكو پارلیریله
تاراج ایتسی، حیات اجتماعی ملته جهالت و تعصب
یوزندن حصوله كن عصیان خصومتكارانه نك هر دقیقه
ازاله سنه امکان موجود اولسی بو انقلاب عظیمك طبایع
مميزه سندن محدوددر .

۱۱ نيسان انقلابی دور استبدادك خاتمه سی و دور
عدالت و حریتك مقدمه سی اولمق اعتباریله تاريخ سیاسیات
عثمانیه ده پارلاق بر فصل مشترك تشکيل ایدم جکدر .
۱۷۸۹ اختلال کبری تاريخ جهان مدیتده نه نیوک بر

دور کال و ترقی به مبدأ تشکیل ایلدی ایسه ، ۱۱ نیشان
انقلاب عظیمی ده تاریخ حیات ملتده عین صفحه تکاملی
وجوده کتیره جک ، عثمانلی ملتک مبدأ فوز و سعادت
تشکیل ایلیه جکدر .

شو کوچوک اثر ، ۳۱ مارت اختلال عسکریسک
الواح الیمه سی ، ۱۱ نیشان مظفریتک صفحات علویه سی
تصویر ایتک ، تاریخه انتقال ایده جک اولان بو مهم
وقایع ضبط و قید ایتک مقصدیه وجوده کتیرلمشدر .

۱. عبدالحمیدك دسائسی واسباب اختلال

عبدالحمید و جنایتلری - ۱۰ تموز انقلابی - قانون اساسی -
فرقه منازعاتی - عبدالحمیدك اعاده استبداد تصوراتی - تدابیر خفیه سی -
فرقه منازعاتندن استفاده سی - اتحاد محمدی جمعیتی - بوجہمینك
ارتجاعه خدمتی - عبدالحمیدك قراری - آوجی طابورلری -
عبدالحمیدك ملت عثمانیه یه خیانتی - مبدأ اختلال .

عبدالحمید تخت عثمانی یه جالس اولدیغی زمان، سلطان
عبدالعزیز دورینك سیئات متوالیه سی ملتی زبون و پریشان
براقیوردی . وطنمزى انقراضدن قورتارمق ، شانلی
برماضی یه مالک اولان عثمانلیلرک مقدرات آتیه سنی تأمین
ایتمک ایچون بویوک برسیعی وغیرته ، خارق العاده
بردهای سیامی یه احتیاج مس ایدیوردی .

عبدالحمید ، بواحتیاجی ازاله ایده جکنی وعد ایدرک
تخت عثمانی یه جالس اولمش، قاردشی سلطان مراد خامسك
خلعی ایچون هر درلو دسائسه مراجعت ایدرک

نائل مقصد اولمغی تأمین ایتشدی. حیفاکه ملتک ادبار
وفلاکتی ده اوتاریخدن اعتباراً بدأ ایله مشدی !

عبدالحمید ، بدایت جلوسنده فکر تجدد ابراز ایتک
ایسته مشدی. اولاً مدحت پاشایی موقع صدارته کتیرمش ،
مدحت پاشانک تشویق واصراری اوزرینه مشروطیت
اعلان ایتمش ، فقط بونی بردرلو هضم ایده میهرک مدحت
پاشایی طائفه نفی ایتدیر مشدی. دهاصوکره استبدادی اعاده
ایچون هر درلو تدابیره توسل ایتمش ، عثمانلی روس حربنک
ظهوری ملت ایچون مبدأ فلاکت تشکیل ایله مشدی.

عبد الحمید ، بوسفرک بوتون حرکاتی ییلدیزدن اداره
ایدیور ، ملتک برجزؤ غضنفری اولان اردویی حربده
بیله ید استبدادی آلتنده بولوندر مقدن حیا ایتموردی .
برلین قونغرده سی ، عبدالحمیدک مظالمی یوزندن حصوله
کلان مغلوبیتلرک بتون جزالینی تعین ایتشدی : صربستان
و قره طاغک استقلالی ، بلغارستانک مختاریتی ، روم ایلی
شرقینک خرستیان بروالی اداره سنه ، قبریسک انکلتراهیه ،
بوسنه هر سکلک آوستریایه ، قارص ، باطوم واردهان جهتلرینک
روسیه یه ترک ایدلمس نه ، فضله اولارق ده روسیه یه
۸۳۰ ملیون تضمینات اعطاسنه مجبوریت حاصل اولمشدی .

عبد الحمید ایسه بومغلوبیت فبیعه نك مكافاتی اولمق اوزره
غازی عنواتی احراز ایله مشدی .

آرتق عبد الحمیدك دورینك بوندن صوكره دوام
ایدن ایام حكومتی خونین برسلسله جنایاتدن بشقه برشی
دكلدر . برطرفدن روم ایاینك محسولدار طوپراقلری
روسلر طرفندن ضبط اولونیور ، طونه نهرینك سبزی
ساحلارینه معكس اولان سطح دلاراسی عثمانلی شهیدلرینك
خون آلود جسدلریله مالا مال اولیوردی . دیگر طرفدن
تونس کا،لاً الدن کیدیور، روم ایلیء شرقی بلغار استیلاسنه
معروض اولیوردی . عبد الحمید وطنك بوفلاکتی قطعاً
نظر اعتباره آلیوردی؛ سلسله جنایاتی حقنده ملتك قوه
محاکمه سنی کبر ایتك ، افکار ظالمانه سنی حس ایتیه جك
برزمین متفسح حاضر لاق ایچون ملتك افساد اخلاقی
ایچون لازم کلن تدابیری اتخاذ ایدیوردی . برطرفدن
اسافل ناسدن مرکب جسم بر خفیه اردوسی تشکیل
ایدیور، بو اردونك هدف فلاکتی اولان اولاد معصومه
ملتی فیزانلره سوردیریور ، مرمرلرده بوغدیریور .
آج براقیوردی .

عبد الحمیدك خلافتی اساساً مشروع دکلدی :

مواعظ دینیہ میں منعہ اجتہاد ایدن ، کتب دینیہ میں احراق
 بالنار ایتدیرن ، وطنک ترقیات مغلوبہ سنہ خادم کتب
 معتبرہ میں محو ایلمین ، اہل اسلامی مظالم کونا کونا ایلم نفی
 وتلف ایتدیرن برخلیفہ نک بونام علوی میں احرازہ لیاقت
 کسب ایدہ میہ جکی طبعی ایدی . فقط عبدالحمید ، ملتی حق
 مشروعی بیلہ طلبدن عاجز برافہ حق درجہ دہ تدایر ظالمہ
 اجرا ایتمش ، وطنی برخرابہ زار اسارتہ تحویل ایلمہ مشدی .
 عبد الحمید دورینک یکانہ خاصہ ممتازہ سی جاسوس لقمدن
 عبارتدی . بو خاصہ منفورہ میں حائر اولان اسافل الکبیوک
 موقع لری احراز ایدیوردی . وطن اوغورندہ تحصیل کالات
 ایدن ناموس پروران ملت فقر و ضرورت ایچندہ پریشان
 اولدینی ائسادہ ، عبد الحمید محافظہ حیات ایتمکن متولد برنشود
 فوق العادہ ایلمہ سرایندہ آتوندلر ، مجوہر لر ، ذوق لر ، نشئلر
 ایچندہ اسرار حیات ایدیوردی .

عصر حاضرک بو ظالم نہرونی ، وطنی کوز یاشی ،
 قان و آتش ایچندہ برافشدی . تاریخہ دور استبداد
 نامہنی آلان بو دور مشئومی خونین بر شائبہ جنایتلہ
 ملوث برافان ارمنی قتالی ، ملتک ضرورت و سفالت
 ایچندہ مظلوم و متأثر : حریت ! صدالین قلبی قلبی تکرار



مجلس مبعوثان رئيسی احمد رضا بك

ایله مسی ، وطنک اداره حمیدیه مظلومندن بر آن اول
 خلاصی ایچون پدر و مادرینی ترك ایدن بك چوق اولاد
 وطنك آوروپاده ضرورت و محرومیت ایچنده مردانه ،
 فقط متأثرانه امرار حیات ایله مسی ، حیثیت ملیه عثمانیه نك
 مغلوبیت سیاسیه یوزندن رهین اضمحلال اولمق درجه لرینه
 کلمسی اداره ظالمة حمیدیه نك طبایع تمیزه سندن معدود در .
 بو اداره مستبدده تمام اوتوز اوج سنه دوام ایتمش ، اوتوز
 اوج سنه بومعصوم ملت خون و آتش ایچنده ضرورت ،
 سفالت چکمش ، اوتوز اوج سنه معزز وطنمرك هر
 پارچه سی عبدالحمیدك محافظه حیات و مظالمی اغورینه
 پارچه پارچه دشمن الینه تسلیم ایدلمشدی .

سلاطین عثمانیه نك اوتودن بری رعایت ایلدک لری
 عادات عثمانیه ، عبدالحمید زماننده کاملاً محو اولمشدی .
 عثمانلی پادشاهلری اجدادلرینك جوامع شریفه سی زیارت
 ایدر لر ، انلرك سوابق شان وشوکتی ایله افتخار ایلر لردی .
 عبدالحمید ايسه وطنك اك مهم نقطه لرینی صرف محافظه
 استبدادی ایچون دشمن الینه تسلیم ایتمش ، دور ساطنق
 دوام ایتدیکی مدتجه ملته قان اغلا تمش اولدیغندن اجدادینك
 سطوت وشوکتی ایله زماننك مظالم وفلاکتی حقنده اذهان

ناسده بر فکر مقایسه پیدا ایتمه مک ، دها طوغریسی
 کنیدیسی هر درلو مظالمی ، اعتسافاتی ، غدارلغی ایله برابر
 یینه خلقه ای طانمق ایچون اجدادی نك مفاخر عسکریه سی ،
 مظفریات فوق العاده سی لسانه آئیرماز ، انلرک مراقیدی
 بیله زیارت ایتمکدن اجتناب ایلردی .

عبدالحمید ، ملتی بار استبداد آلتیده ازمش ، ملتک
 شعله افکارینی سوندیرمک ایچون هر درلو مظالمی اجرادن
 کری طور ماماشدی . سلاطین عثمانیه اسانید شعر و انشایه
 حرمت ایدرلر ، ادبانی مظهر احترام ایتمکدن خالی قالمالزلر .
 بوش زمانلرینی مطالعه تواریخ و تنظیم اشعار ایله امرار
 ایدرلر ، وقت سفرده محاربه میدانلرنده فدای جان
 ایلرلردی . عبدالحمید ، وطنک برر ترانه دار ذیروحي ،
 اولاد وطنک اک حساسی اولان شعرا و ادبانی منفالرده
 سوروندیرر . آنلرک اولاد و عیالی نان پارویه محتاج بر
 حالدیه براقیر ، بوش وقتلرینی نیجه خانمانلرک سونمسنه بادی
 اولان ، ملتی قهر و ادبار ایچنده یاشاتمق ایچون اسافل
 جواسیس طرفندن ترتیب اولنان ژورناللری مطالعه ایله
 امرار ایدردی .

عبدالحمید ، ییلدیز سراینی کنیدیسنه مقر استبداد

اتخاذ ایتش، اجدادینک اثرینه قطعیاً اقتفا ایتزدی. عبدالحمید
 کانجیه قدر بتون عثمانلی پادشاهلری مرین و محتمم سلطنت
 قایقلرله شاهانه تفرجلری اجرا ایدرلر، گاه بکقوزک سایه دار
 اورمانلری ایچنده، گاه کاغذخانه نك چاغلان کوشکلرنده
 امرار حیسات ایلرلر، ملتله برابر یاشارلر، ملتله تماسده
 بولونمغه غیرت ایدرلردی. عبدالحمید، ملتک بر خصم جانی
 ایدی. ملتی محو و پریشان ایلیمکی کندیسینه مشغله یکانه
 اتخاذ ایلهمشدی. انک عنندنه مفاخر اجدادک، رحم
 و شفقتک ذره قدر اهمیتی یوقدی. اک مقدس بیلدیکی
 شی، نفسی و بونفسی محافظه ایتک ایچون اتخاذ ایلهدیکی
 تدابیر ظالمانه ایدی.

بر حکمدارک ملتله برابر یاشامسی، ملتک احوال
 ظاهریه و فکریه سنه مطلع اولمسی، ملتک محبت قلبیه
 و احترامات مخصوصه سنی جلب ایچون فوق العاده الزمدر.
 عبدالحمید ملتدن او قدر اوزاق یاشامش، اولاد وطنک
 پریشانینسنه اودرجه غیرت ایلهمشدی که، هر کسک قلبنده
 ظلم و استبداد ایلله مرادف اولان بونامه قارشى عظیم بر
 نفرت و عداوت حاصل اولمشدی. بوعداوت انقلاب
 اخیرى متعاقب فعلاده اثبات ایدلمش، عبدالحمید نامی

وطنپرور قلبلرده عظیم برحس نفرت پیدا ایتمکن خالی
قلمامشدی .

عثمانلیلرک وبالخاصه عثمانلی اردوسنک حکمدارلرینه
محبتی مثل سائر حکمنده در . عثمانلی اردوسنک مظفریتی،
عثمانلی پادشاهنک مظفریتی عد و اعتبار اولنوردی . ملت
ایله پادشاه بیننده کی روابط غایت صمیمانه ایدی . بوروابط،
عبدالحمید ثانی زماننده ظاهری بر حال کسب ایتمش؛ فقط
قلبلردن الی الابد سیلنممشدی .

حال بوکه ملت ایله پادشاه بیننده غایت صمیمی بر
رابطه موجود اولمق اقتضا ایدر . حکمدار بر ملتک
تمثال نجا بتیدر . ملتک نظر حرمت و احترامنی جلب
ایتمین بر حکمدارک تحت و تاجی اساسن بر استنادگاه
موقتدن، محکوم زوال بر شعشعه موقته دن بشقه بر شی
دکلدر . بیوک فره دریقک دیدیکی کبی : « بر حکمدار
ملتک اک برنجی خادمی اولمالیدر . » و بو خدمتده ملتک
اعماق قلبنده عظیم بر حسن احترام او یاندر مالیدر .

عثمانلی ملتی ، اوتوز اوچ سنه دن بری حکمداره
محبت حسنی قلبندن ابدیاً سیلنممشدی . و بونی ده کنیدیسی
ایچون موجودیت ملیه نامنه حقیقی بر محرومیت ، بر

اکیسکلک عد ایدیوردی. اوروپا حکمدارلرینک فعالیت
سیاسیه سنی، مناسبات بین المملده حائر اولدقلری موقع
واعتباری صحیفه جرائده مطالعه ایتدکجه، بونی عبدالحمیدک
مظالم و سیئاتی ایله مقایسه ایدیور، بتون جرائد اجنیه نک
(قائلی سلطان) نامیله یاد ایلدکلی، حکمداران موجوده
میداننده اک ظالمردن عد اولنان بر پادشاهه مالک اولمق
بدبختلغنه دوچار اولدقلرندن طولانی مایوس اولیورلردی.
عبدالحمیدک قاردشلی حقننده نفرت و عدواتی پک
ظالمانه ایدی: عبدالحمید، طولمه باغچه سراینده اقامت ایدن
سلطان محمد رشاد خان خامس حضر تلبنی جاسوسلرله
محاصره ایتدیریور، سلطان مراد مظلومی چراغان سراینه
حبس ایدیوردی. بوایکی سرای، عبدالحمید ظالمک
برادرلرینه تخصیص ایتدیکی برر محبس حکمنده ایدی. بو
سرایلرک اطرافی صباحرله قدر نوبتجیلرله ترصد ایدیلیردی.
قیشین، دکرده مدھش طالغملر، هواده حیانقریب قاصر غملر
پیدا ایدن هولناک، خشیت انکیز فورتنملر، مرمریه ناظر بو
ایکی سرایک ریختملری اوزرینه برصولت عقورانه ایله
آیلدینی زمان، اوراده، عبدالحمیدک تطمین احتراصاتی
ایچون صباحرله قدر نوبت بکله یین یچاره نفراتی تفنکلیله

برابر آلیز کتورر ، مائی مرمرء نك قعر نده یاتان شه دای
 وطنه معصوم بروطن اولادی دهالتحق ایلردی . بعضاً
 چراغان سراینك جسم آیلانتوسلر ، معطر اخلامورلر ،
 مهیب چنارلر آتنده برسکون ماتمین ایله آغایور کبی طوران
 پنجره لرینه عطف نظر اولندیفی زمان ، بوراده محبوس بر
 پادشاهك اولاد لر یله برابر یأس و سفالت ایچنده یاشادیفی
 تخطر اولونور ، اوزمان وطنی ، ملتی ، خاندان سلطنتی فلاکت
 و اضمحلاله سوق ایدن ییلدیز ظالمی حقنده قلبده عظیم بر
 طغیان عداوت حصوله کلیردی .

بر صباح ، مراد مظلومك وفاتنی بر لایفیدیء ظالمانه ایله
 ملتله اعلان و اخبار ایدن بر تبلیغ رسمی ، بتون کوزلر له اشك
 تأثر دو کدیرمشدی . عبدالحمید ، خانم انلر سون دیرن
 خفیه لرینك جنازه سی ایچون هر درلو اختفالاته مساعدده ایله دیکی
 حالده ، بیچاره قارده شنك نعش محترمنی بر صباح ایرکندن ، درت
 خفیه اوموزنده یکی جامعه نقل ایتدرمشدی . اوکون
 جنازه نك کچه چکی سوقاقلر ، بو فاجعه الیمه نك قلب ملتده
 حس انتقام تولید ایتمه سی ایچون کاملاً تخلیه ایدلمش ،
 تك توك کلوب کچنلر برر برر نفی اولونمشدی .
 عبدالحمیدك بو ظلمی ملتی اودرجه متأثر ایتمشدی که ، پك

چوق کیمسه لر مراد خامسك حیات بدبختانه سی ایچون
اشك تاثیر دو کیور، بابالری زندان کوشه لر نده یاتان، فیزانلره
نفی اولونان عائله لر آجی آجی آغلا ییورلر، فقر
و ضرورت ایچنده یاشامغه محکوم اولیورلردی.

عبدالحمیدك استبدادی آرتق تحمل ایدیه میه جك بر
درجه یه کله شدی. بو کابوس مظلومی ملتك سر فلاکتندن
قالدیرمادجه امید نجات و سلامت امکان خارچنده ایدی.
عبدالحمیدك ازاله وجودینه تشبث ایدن فداکاران وطن،
ییلدیز میدانی مدهش بر بومبا تاثیریه مخوف زلزله لر
ایچنده برافدقلری زمان، عبدالحمیدینه تخلیص حیاته
موفق اولمش، جکرلری پارچه لانیان چوجقلر، قانلره
بوغولان عسکرلر، دیوارلره یاپیشان انسان بینلری،
قانی ات پارچه لری اره سندن بر هیولای ظلم و اعتساف
حالنده سراینه دونمشدی. آرتق اوندن صوکره محبس لر،
زندانلر تکرار آچیلشمش، قافله مظلومین کوزلرندن خون
تأثر آقیده رق مجهول افقرلره طوغری کوندرلمکه
باشلامه شدی.

عبدالحمید عثمانلی ملتک فلاکتته خدمت ایدیوردی. ملت،
فقر و ضرورت ایچنده یاشادیغی، یمه سوق اولونان عسکرلر

معاشمیز، اچ بی علاج چولار اور ته سنده قالدینی حالدہ، عبد الحمید
واردات حکومتی سرقت ایدیور، حق ملتی غصب ایلوردی.
اردونک تجهیز و تنسیقی حقندہ متعدد لایحه لر تقدیم ایدلدیکی
حالدہ، عبد الحمید بونلرک هیچ برینی مطالعه ایتیمور، خانانلر
سوندیرن، عائله لر پریشان ایدن ژورناللر مطالعه سیله وقت کچیر-
یوردی. ملت، ضرورت و سفالت ایچنده یاشایور، عبد الحمید
موفقیات ظالمانه سندن ممنون و مفتخر یوزلرجه جاریه لر،
الماسلر، یاقوتلر، آلتونلر، بانقوطلر، بی نهایت ژورناللر
ایچنده خونریزانه، خسیسانه بر حیات امرار ایدیوردی.
عبد الحمید، اولاد و وطنی برر برر منفارده سوروندیردیکی
ائساده روم ایلیده آتش اختلال حکم فرما اولیوردی.
وطنک بو دلنشین ساحه لری کنج ضابطلرک، ییچاره
عائله لرک، معصوم چوجقلرک قانلریله مالامال اولیوردی،
ییلدیزسراینی طولدیران اسافل حشرات کویا ناموس پروران
ملتک مقدراتیله استهزا ایدیورمش کی هر درلو نعم والطفه
مستغرق اولدقلری ائساده، اناطولیده قحط و سفالت حکم فرما
اولیوردی. ساحه وطنی طولدیران فریاد مظلومین
عبد الحمیدک ظلم و جنایتله قاراران وجداننده بر عکس
ترحم بولامیور، فقط جکرکاه ملتدن قوپان فغان



برنجی فریق محمود مختار پاشا

مظلومانه بارگاه ابدیتده جای قبول بولیور ، عبدالحمیدك
خاتمة استبدادی آرتق تقرب ایدیوردی . ۱۰ تموز
انقلابی بو سلسله استبداده نهایت ویرمش ، ملت عظیم
بر سرور حربت ایچنده اثبات موجودیت ایله مشدی .

۱۰ تموز انقلابی روم ایلمیده قطعی نتیجه لر حصوله
کثیره جک درجده حاضرلاندیغی انشاده استانبول بار
استبداد آلتنده بی تاب بولونیوردی . بو استبدادك
هوای فاسدینه آیشانلر کنیش نفسلر آلهرق خالدن
ممنون ، آئیدن بی خبر بر صورتده عبدالحمیدك قوتنه
استناد ایدیور ، وطنی قوه قاهره سیله فلاکتدن تخلص
ایده جک اردونك رسنه طاغلرندن بیسلیزلی تهیدیات
متوالیسی آلتنده بولوندیردیغی خبر آلان وطنپروران
ملت ایسه قلبلرنده عظیم برفرح و انبساط اولدیغی حالده
آتی وطنك شمعنه بی نهاییه سیله ممنون اولیوردی . فقط
بر صباح ، اوراق حوادثده کورولن بر اعلان ، ملتك
ناصیه سنده ظاهری برلمه سرور حصوله کتیردی . جبراً
آنان بر حریتی صافدلان اهالی یه قارشى لعناً ویرمش بر
عاطفت صورتنده کوسترن بو اعلان رسمی شوسطرلری
احتوا ایدیوردی :

شرف‌تلق بیوریلان ارادهٔ سنیۀ حضرت ظل‌الاهی
منطوق هابونجه مرجع عالیسندن کشیده قلنان تلغرائنامۀ
عمومی صورتیدر :

تأسیس جلیل جناب خلافت‌پناهی اولان قانون اساسیده
صورت تشکیلی بیان اولنان مجلس مبعوثانک اجتماعه دعوت
اولنسی شرف‌تلق بیوریلان ارادهٔ سنیۀ حضرت خلافت‌پناهی
ایجاب عالیسندن بولنش و حکم جلیلی بالجمله ولایات شاهانه
والیلک‌لریله لویه غیر ملحقه متصرفلر بنده تبلیغ قانمش اولمغله
اوراجده قانون مذکورده مندرج صفاتی حائز اعضانک
انتخابک اجرایی .

*
* *

تموزک اون برنجی کونی صباحی، استحصالی حریت ایدن
عثمانیلری عظیم برمنونیت ایچنده براقان بواعلان، سنلردن
بری ظلم واستبداددن بشقه برشی کورمه‌ین ملتہ کنیش
بر نفس آلدیردی . آرتق سوقاقلر بیوک بر
سوینج ایچنده دونانیور، نمایشلر کوز یاشلری ایچنده
اجرا ایدیلیور، بتون شهر بی نہایہ برترانہ حریت
ایچنده عکس انداز اولیوردی. بوسرور وشادمانی یه عبد-
الحمید بیله اشتراک ایدر کی کورونیوردی. غزتہ لر جبراً

آنان بوحریتهك عبدالحمید طرفدن ویرلدیكنی یازده جق
درجه ده ابراز سماحت ایدیوردی . بوشنلكر کیجه
کوندوز، آیلرجه دوام ایتمش ، نهایت انتخاب اجرا سنه
موفقیت حاصل اولمش، مجلس مبعوثان عظیم بردبدبه ایله
کشاد ایدلمشدی .

عبدالحمیدك مجلس مبعوثانده همان پك آز مدت
طورمسی ده اثبات ایدیوردی که ، ملتك قاننی دوکمدکن
باشقه بر وظیفه ایفا ایتمین بوقانلی پادشاه وطنك حریتی
بر درلو چکمه مش ، ملتی بتون حریت وجدان و افعالیله
کورمکدنسه بر آن اول مجلس مبعوثاندن چکمه کی ترجیح
ایتمشدی . و او آندن اعتباراً بو معزز حریتی ملتك
آندن غصب ایتك ، ساسله جنایانه یکیدن باشلامق ایچون
تدبیرلر ، دسیسه لر دوشونمکه باشلاهشدی .

عبدالحمیدی سلطنتده براقق کبی بیوک بر علوجناب
اظهار ایدن ملت ، بو ظالم پادشاهه ظاهری بر محبت
ابراز ایتمکدن ده خالی قالمشدی . آرتق هرکس عبدالحمیدك
اعاده استبداده موفق اولامیه جغنه قائل اولیور ، آوجی
طابورلری سلانیکدن استانبوله کتیریلیور ، فکر حریده
خدمت ایدن بو طابورلردن رجعت استبداده قارشی

مقاومت اجرایی تصور اولونیوردی . بو طاہورلرہ
 حدندن زیادہ اہمیت ویریلیور، آوجی طاہورلرینک سائر
 طاہورلر اوزرینہ بیوک بر تاثیر اجراییتدیککی کورولیوردی .
 بو تاثیرک ، ۳۱ مارت اختلال عسکریسنہ پک بیوک
 دخلی اولمش ، حربتی محافظہ مأمور ظن ادیلن
 دردنجی آوجی طاہوری استبدادی اعادہیہ خدمت ایلمشدر .

* *

مجلس مبعوثانک کشادنن بر مدت صوکرہ فرقہ منازعانی
 باش کوسترمشدی . بو منازعات شخصیانہ انتقال ایدہجک
 درجہدہ دوام ایدیور، جر منفعت ایچون تشکیل اولونان
 بعض جمعیتلرمیان استبداد اولان ذہنلردہ برامل ارتجاع حصولہ
 کتیریوردی . فکر ارتجاع ، بتون قانلی لوحہلربلہ
 قومدن فعلہ کلک ایچون آنی بر فرصتک، قوتلی بر تشویقک
 ظہورینہ وابستہ بولونیوردی . او آنہ قدر فکر
 ارتجاعک ظہورینہ یکانہ مانع، اتحاد وترقی جمعیتی ایدی .
 جمعیت محافظہ مشروطیتہ مقتدر، منور، وطنپرور فکرلردن
 مرکب بولونیور، ملتی استبداددن خلاص ایچون ہر درلو
 فداکارلنی اختیار ایدیوردی . فقط جمعیتہ مخالف اولمق اوزرہ
 اتحاد محمدی نامیلہ اساسسنر ، فقط جلب قلوب ایچون
 مؤثر بر جمعیتک تأسیسی، جمعیتدن ممنون اولیلانلرلہ

فكر استبداده خدمت ايدنلر ايجون بر وسيله
 انتفاع اخاذ ايدلمشدى . بو جمعيت اعاده استبداد ايجون
 تأسيس ايدلمش اولديغى حالده ، اسمنك اهميتى جهالاي
 عوام اوزرينه بيوك بر تاثير اجرا ايديور ، غيرمنونلر
 فرقهسنة بر استناد تشكيل ايديوردي . عبدالحميد بو
 حادثات سياسيه نك بتون صفحاتى تعقيب ايديوردي .
 عبدالحميدك بر مقصدي واردى : اتحاد محمدى جمعيتنى آلد
 ايتك ، اتحاد فرقهسيله احرار فرقهسى بيننده كى منازعاتدن
 استفاده ايلمك ، جهله ناسى بر تاثير معنوى ايله آلد
 ايتدكن صوكره بوقوتى آوجى طابورلرينه قارشى استعمال
 ايله مكندى . عبدالحميد آوجى طابورلرني آلد ايتدكن
 صوكره بتون طابورلرى قيام ايتديره جكنى بيليور ، و بو
 سايله مشروطيتى ده ، حريتى ده پریشان ايدمك كنه ، كنديسندن
 استرداد حريته موفق اولان ملتدن حقيقى بر انتقام
 آلاجهنه قانع بولونيوردي .

عبدالحميد ، اجنبى بانقه لرندن كيتيرديكى ايكي مليون
 ليرايى بو املك حصولنه تخصيص ايديور ، دردنجى
 آوجى طابورنى آلد ايتك ايجون پاره لر توزيع ايتدير يوردي .
 عبدالحميدك افراده تلقين ايتديرديكى يكانه فكر ، شريعت

ایسته مکدن عبارتدی . فقط شریعت اولانجه علویه ایه
حکم فرما اولیوردی !

عبدالحمید بو تصورات ائیمه ایه مشغول اولدینی
صرده بر غزته محررینک کوپری اوزرنده قتلی ایشه
باشقه بر رنک ویرمش ، خصوصیه قاتلک بولونماسی
بو جنایته برکسوه اسرارانکیز بخش ایه مشدی . عبدالحمید
بوفرصتی قاجیر مامغه قرار ویریور ، اعاده - تبءاد ایچون ترتیب
ایتدیکی پلانی آتی بر صورتده تطبیق ایه مکه باشلا یوردی . بر
طرفدن قیدشله لره کیزلی کیزلی پاره لر توزیع ایدیلیور ، بویاره لر
درجیب ایدن جهلای نفرات درحال برر حامی شریعت
کسیلیوردی . عبدالحمید هر شئی حاضر لامشدی .
عسکرک اجانبه طوقونماسنی تأمین ، اختلالک مقتدر خانلر
طرفندن اداره سنی تسهیل ایه مشدی . بتون عسکر
آیاصوفیه میداننه طوپالانه جق ، شریعتک محو اولدینی
سویلانه جک ، جمعیت محو ایدیله جک ، حریته خدمت
ایدن ضابطلر کسیله جک ، مبعوثلردن اک مقتدرلری تلف
ایدیله جک ، قاینه نك دکشدرلمسی طلب اولونه جقدی .
و صوکره عبدالحمید ، سنه لردن بری طومادینی قانلره


افراد معصومه ملتی سراپا غرق ایدہ رک سفیل پاشلری ،
جانی مأمورلری . آچاق جاسوسلریلہ ادامہ حیات ایدہ جک ،
ینہ اولاد وطن منفالردہ سورونہ جک ، ینہ ضابطان
سفالت ایچندہ یاشایہ جق ، ینہ چو جقملر اوکسوز قالہ جق ،
ممراتلی کوز یاشلری دوکولہ جکدی !

۳. ۳۱ مارت اختلال عسکریسی

۳۱ مارت صبحی - عاصی عسکرلرک آيا صوفيه اوکندداجتماعی -
۳۱ مارت وقایعی - ۱ نيسان کيجه سی - ۱ نيسان وقایعی - مکتبلی
ضابطانک قتلی - ۳ نيسان سلامفی - استبداد عسکری - عبدالحمیدک
ممنونیتی - اختلال عسکرینک ایکنجی و اوچنجی اردولره تأثیری - حربت
اردوسنک استانبول اوزرینه حرکتی .

۳۱ مارت صبحی، استانبول آفاقنی دهشتلر ایچنده
براقان متوالی تفنک صدالری ایله انفلاق ایتمشدی. کيجه
ساعت یدیده باشلايان عصیان عسکری کتدکجه توسع
ایدیور، عسکر آياصوفيه میداننه فوج فوج طوپالانیور،
یشیل، سیاه، بیاض بایراقلر بو عصیان عسکری
مرتبلیرنک فکرلری قدرمشوش برحالد آياصوفيه میداننده
تموج اییدیوردی. آرتق هرکس سوقاقلره فیلامشدی.
اختلالک ایلك نشانه هیجان انکیزی اولان تفنک صدالری
خلقى تماماً ایقاظ ایتمش، هرکس بوناکھانی اختلالک

طاش قيشله



اسباغی اگلامق ایچون متردد خطوه لرله ایلریلیور، صباحک
سکونت سحریسی ایچنده آیاصوفیه میداننه طوغرومساح
عسکرلرک، خواجهلرک قافله قافله کیتدکری کورولیوردی.
اوتوده، بوغلبه لکک متوالی جریاندری اره سنده، قیرمزی
فسلی، پانطالونی بیرتیق، فسی پوسکولسز، پارمقلری
پوینندن چیمش برسر سرنک بدستانه، عاصیانه برطور
ایله شریعتدن بحث ایتدیکی ایشیدیلیور، بریده بو عصیان الیم
نتیجه لر احداث ایده جکنه مطمئن بروطنرور، ملال
آلود، اندیشه ناک برسیما ایله دوشونیور و بو اختلاک
بتون صفحاتی تدقیق ایچون قافله لر اره سنده ایلریلیوردی.
آیاصوفیه میدانی صاری البسه لی، پارلاق سونکولی آوجی
طابوری افراد ایله طولمشدی. جیلرینی آلتونلرله طولدیران
بوعاصیلر، شریعتک بررقهرمانی کیلمشلردی. بتون
عسکر آیاصوفیه میدانی احاطه ایتمش، سوقاق باشلرینی
طوتمش، خواجهلردن بشقه کیسه نك کچمه سنه مساعد
ایتمیوردی. سلطان احمد باغچه سنک اوکی صنایع آلائی صبیان
بلوکلریله قوشادلمشدی. وطنک بونانکور چو جقلری، الارنده
مارتینلر، متصل اوینایورلر، ییلیشیق، شماریق برسیما ایله تفننکلرینه
طیانیورلر، آوجی طابوری نفرلرینک بتون امرلرینه

منقاد اولیورلردی . آیاصوفیه میدانی . دیوان یول اطرافنی
 احاطه ایدن بوعاصی عسکر اردن سندن هیج بر کیسه کیم یور ،
 پولیسر کویا بو حرکت عصیانیده ادامه انضباطه مأمور
 اعشدر کبی بر فعالیت فوق العاده ایله عسکرلر اردن سندن
 طولاشیورلردی . اوتوده بر ژاندرمه ، فسنی آرقه سینه
 ییقمش ، تفکنی اوموزینه آلمش ، آلمدن آقان ترلری
 سیلیور ، دیگر طرفدن صیدیان افرادینه نطقلر ایراد
 ایدیور ، وبو حاکمیتدن ممنون و مفتخر صفلر اردن سندن
 طولاشیورلردی . صوکره بر قاج آرجی نفری قیشله لره
 قوشیور ، اغفال ایتدیکی نفرلره برابر دیوان یولندن کچیورلردی .
 خلق بو اختلال عسکرینک بتون اسرارینه غیر واقف
 دیوان یواننده کتدکجه تزايد ایدیور . حربیه نظارتی جوارنی
 عاصی عسکرله مالامال اولیورلردی . عصیان عسکرینی
 باصدیرمق آرتق امکان خارجه کلمشدی . خاصه قوماندانی
 بو اختلالک بر آن اول اوکنی آلمق ایسته مش ، فقط حربیه
 ناظرینک ترددی ، صدر اعظمک قورقاولغی هیج بر تدبیر
 اتخادینی تأمین ایده مه مشدی . اختلال کتدکجه توسع
 ایدیورلردی . قیشله لرده ضابطلر پارچه پارچه ایدیلیور ،
 نصیحته جرأت ایدن ضابطان ایکی قورشونله آتدن

دوشوریلوردی . بوجنایتلر کتدجکه تزايد ایدیوردی .
 برضابط کو پریده جانیانه بر صورتده قتل ایدلمش ، آقشاملره
 قدر سوقاق اورته لرنده یاتور ، آرابه جیلر بر تعصب ظالماه
 ایله بوبدبخت قهرمانی طاشیمقدن اجتناب ایدیوردی . آرتق
 بتون سوقاقلر اهالی ایله طولمش ، دیوان یولک غلبه لکی
 فوق العاده تزايد ایله مشدی . ساعت بشه طوغره ایدی که ،
 اوزاقدن بیاض ، بم بیاض بر قافله کورندی . بوقافله ، صرف
 خواجه لردن مرکبدی . قافله نک اطرافنده اوزون بویلی ،
 کونشدن یوزلری یانغش عسکرلرک کسکین قصا طوره لری
 یار لایور ، اوکده بر بوریزن آیاصوفیه میداننه طوغره
 بورو چالیوردی . قافله نک اوکنده ، ایچنده ، اطرافنده
 پژمرده قیافت . آیانغی چپه سلاق ، تعصبندن چیلدیر مق
 درجه لرینه کلش جهله عوامک باغیره باغیره کیتدکلری
 کورولور و بتون و بولوله عظاما ایچنده آهسته ، خفیف
 تکبیر صدالری ایشیدیلوردی .

بوقافله آیاصوفیه میدانی تماماً طولدیر مش . عسکر دن
 نه ایستدکلری سؤال اولونمشدی . عسکر درت شی طلب
 ایدیوردی :

۱ . قاینه نک سقو طی ،

۲ . مبعوثانندن بعضلك مباعدى ،

۳ . احكام شرعيه نك تمامىء تطبيقى ،

۴ . آلايلى ضابطانك يرلرينه تعيينى .

فقط بودرت آرزو ، استبدادى اعاده همچون تماماً كافى

ايدى . عسكر بو آرزونك ساعت يدى به قدر ايفاسنى طاب

ايدىيور ، بواننده جنايتلر ايقاعندن خالى قالمىوردى .

بنای ربانى ظالمانه بر صورتده ييقيمق جسارتنى كوسترن

بودنيلر ، جيبيلرينه تولد يردقلى رشوتلر تأثيرى ايله

شريعتدن ، عدالتدن بحث ايدىيورلردى . آرتق تفنك

صدالرى استانبول آفاقنده مديد طينلر حصوله كتيرمكه

باشلامشدى . جېخانهلر چاتير چاتير قيريليور ، ساحلر

حريصانه يغما اولونيوردى . وطن ، ملت ، حریت تهلكهده

بولونيوردى . هر كس ايكيشمراوچر طوپلانمش ، بواختلالدن

متأثرانه بحث ايدىيور ، عاصى نفر قورشونندن قورتيلان

كنج ، وطنپرور ضابطلك سيويل البسهلرله كزدكلرى

كوروليوردى . بتون بوعاصى نفرلرله ايسته دكلرى سئوال

اولوندينى زمان : شريعت ايسترز اديسورلر ، فقط بو

طلبلرينى محق كوستره جك هيچ بر دليل كوستره ميورلردى .

آياصوفيه ميداننده ، بياض چيچكلر آچغه باشلايان كستانه

آغا جلری نك لطیف كولكلى آئنده صارى البسه لى عسكر لرك
سونكولى پارلايور . بتون حرکات آوجى طابورندن ايکي
چاوش طرفندن اداره اولونیوردی . بوچاوشلر بتون
عسکره قوماندانلق ایدیور . معیتلر نده بر قاج نفرله بر
بورزن بولونیوردی . ايکي چاوشك بروضع وقورانه ايله
ويردکلى امرلر تکميل افراد طرفندن کمال سرعتله اجرا
اولونیوردی .

اوگون مجلس مبعوثانه کان مبعوثلرک مجموعی ، انجق قرقه
بالغ اولمشدی . مبعوثلردن بعضلى وطنك تهله کده بولونديغنى
بیان ایدیور ، عصانك آرزولرینی اسمافدن بشقه چاره
قلمدينی درمیان اولونیوردی . فقط قابلرده جايکیراولان
اندیشه وهیجان ، کمال سکونتله اجرای مذاکره یه مانع
اولیوردی .

مبعوثان ، مذاکرات ايله مشغول اولديغنى صروده
سونکولى نفرلرله برابر بر هیئت علمیه مبعوثان صاوننه
داخل اولمشدی . هر طرفده عظیم بر هیجان حکم فرما
اولیوردی . طیشاریده ، آیاصوفیه میداننده ، صارى البسه لى
آوجى نفرلری ، پثر مرده قیافت ، بیاض صاریقلى خواجه لر
بر سیلابه بوقلمون حالنده دائمی بر طغیان ایچنده بولونیور ،

آجی آجی سامعه یه عکس ایدن بورو جداری متادیا
تکرر ایدیور . عسکرلرک مدھش آوازدری توکاری
اور پرتیوردی .

مبعوثاندن بعضلری باب عالی ایله ، حربیه نظارتی
ایله محاوره ایدیور ، مجلس مبعوثانده قابینه یه عدم اعتماد
فکرلری ایلری یه سورولیوردی . بو صرده بر قاق نفر ،
پارلاق سونکولری ، ماحی حیات تفنکریله ایچری کیرمشر ،
مراملرینی افهام ایدهمیه جک بر جهالت صرفه ایچنده خوف
وتهدید اماردر کوستریورلردی . هیئت مرخصه علمیه دن
برذات ، عاصی عسکرلرک سونکو اوچلرینه کورده نرک
کرسى خطابته چیقمش ، جاهلانه ، عاصیانه بر نطقه بو
عاصی عسکرلرک حسیاته ترجمان اولمق ایستیوردی . وطنده
شریعت اولانجه احکامیه جاری اولدینی حالد ، مبعوثانه
شریعت درسی ویریلیور ، فقط طیشاریده ، سوقاق باشلرنده
قیشله حولیلرنده بیک درلو جنایتلر ایقاع اولونیوردی .
انسان بتون بو جنایتلری ، بتون بومطالبات غیر مشروعه نی
دوشوندکجه شریعت نامنه فریاد ایتمکدن کندیسنی آلامیوردی !
بونطق جاهلانه ختام بولور بولماز ، قیر صقاللی بر
بیکباشی مبعوثان صرهلرینه چیقمش ، مهیج ، تهدید آمیز

برصد ایلله شریعت اوغورنده فدای جان ایده جگنی سویلیوردی .
 فقط نطقنك نهایتده چولق چوجق صاحبی اولدیغنی .
 آچیقجه چیقارلمش بولوندیغنی برصفوت جاهلانه ایلله بیان
 ایلله دیکی زمان ، کندیسنك شریعت اوغورنده دکل ، ملنك
 علوجنابی سایه سنده هر زمان بولایلدیکی نان و نعمتی افکار
 ایدرلک حرص وطمعی اوغورنده قانلر دوکملک ایستدیگنی افهام
 ایدیوردی .

مبعوثان ، بیسک درلو رنجارله بو هیئت مرخصه نی
 طیشاری چیقارمغه موفق اولمش ، نهایت قایینه نك استعفا
 ایتمسینه قرار ویره مشدی . نفرلر ایسه متصل تلغرافه مراجعت
 ایدیورلر ، سلطان حمیدك کلمسی مصرانه ، تهدیدکارانه
 طلب ایلورلردی . برقاج دفعه لر : «سلطان حمید کلیور !»
 دییه شایعه لر چیقمش ، خنکارلوجه سی تمیزلشمش ، فقط
 عبدالحمید ییلدیز سراینده قالدینلر اره سسندن طیشاری
 حقیقه ماشدی .


آیاصوفیه میداننده غلبه لك کتدکجه تزايد ایدیور ،
 سو قافلردن کچمك امکان خارجه کلیوردی . برطرفدن
 سونکولری طاقش نفرلر ، ترلر ایچنده ، هیج بر طرفه
 باقیه رق آقین آقین کلیور ، دیگر طرفدن میدانه داخل

اولان قطعەلر ، چاوشلر ك اسريله كنديلرينه كوستريلن
 يرلرده اخذ موقع ايدىيورلردى . اوزاقدن ياواش
 ياواش ، صارارامش ، بىم بياض بىزلر بله رقاچ مبعوث كورونمكه
 باشلامشدى . هر مبعوثك رفاقتنده ايكي نفر كيدييور ، فقط
 مبعوثلرده عظيم برتردد نمايان اوليوردى . بونلر كادايلىر .
 يليور . كاه كريله مك ايسيتيور . كنديلرينى هر طرفدن
 احاطه ايدن اولوم تهللكه لرى ايجنده هيجان انگيز ، فقط
 بيتابانه آديملرله ايلر يليورلردى . برمدت صوكره بر آرابه
 طور ديرلمش ، كنج بر مبعوثه آرابه دن اينمى تكليف
 ايدىليوردى . سونكولر تهديد آميز بر صورتده اوزرينه
 توجه ايدىليور . بو محترم مبعوث تفكرك اوزرينه طوغرو
 توجه ايدلديكنى كورر كورمز : بن جاهدك دكلم ، سزه
 اثبات ايديم ! ديهه مأيوسانه فرياد ايدىيوردى ؛ اوتده
 باشقه برنفر : اودر ، اولديرك ! ديهه باغرييوردى ؛
 اوزمان ماوزرلر بوشانيور ، سونكولر قانلره بويانيوردى .
 انسان قانى دوكمك بو عاصى نفرلر ايجون بيهوك
 بر موفقيت ايدى . بونلر وطنك محترم اولادلرينى بوصوزتله
 تلف ايتكه موفق اولونجه ، در حال هوايه تفنك آتمغه
 باشلايورلر ، اوزمان سيويللر ييغين ييغين قاجيشيورلر ،



حریت اردوسی ارکان حرب رئیس فریق پرتو پاشا

ایستافتانوسده مجلس مبعوثان اوکنده اعیان رئیس سعید پاشا



بره دت سوکره بوجیع جنایتلری کورمک ایچون تکرار
طوپلانیورلردی .

آرتق اقشام اولمغه باشلامشدی . عسکر هیچ برقرار
اتخاذ ایدمه مش . ادرنه اق عظیم برهیجان ایچنده قلمشدی .
ظلام لیل آیاصوفیه نك جسم قبه سنی برهیولای معظم
حالمده کوستریور ، هوا غازلرینك الماعات بیتابانه سی
آلتنده قضاطوردرلک پارلادینی کورولیوردی . وظنی بو
عصیان الیم ایله پریشان اتمک تشبث ایدن وحدتی ، باشمه
یشیل برصاریق صارمش ، خواجه قیافتنده ، سونکو
پارلتیلری اده سنده طولاشیور ، الده یشیل بریاراق ،
صافیل ، عاصی عسکرلره شریعتدن بحث ایدیوردی .
اوزمان ، وطن داشلرینك قانلرینی ایچون بونفرلر برتسامیت
دیندارانه ایله قوشوشیورلر ، وحدتینك الی اوپمک ایچون
بربریه رقابت ایدیوردی . وحدتی ، بروضع وقورانه
ایله عسکره امرلر ویریور ، بوامرلر درحال قطعاته تبلیغ
ایدیلیوردی .

کیجه اولمغه باشلامش ، تفنك صدالری الان نهایت
بولمامشدی . قابینه یی دویرمکه ، ارباب اقتداری قتل اتمک
موفق اولان نفرلر ، شمدی یکی قابینه انتظار ایدیورلر ،

ایاصوفیه میدانن طولدیران عاصیلر فوج فوج سرکجی به
طوغرو ایلریلیورلردی. سوقاقلر کتدکجه قاراریور، ظلام
ایل هر طرفه استیلایدیوردی. آیاصوفیه طرفندن، سرکجی
اوکلرندن بورو سسلری، سلاح پاتیردیلری ایشیدیایور.
اردهده صروده: چوق یشا! صداری کیجه نك سکونت
بی نهاییسی ایچنده ظنین انداز اولیوردی. آرتق عسکر
آرزوسنه تماماً نائل اولمشدی. حربیه نظری دیکشمش،
کیجه ساعت اوچده بتون عسکر قیدشله رینه عودت ایله مشدی.
فقط بو عودت پك ولوله انکیز ایدی. بر طرفدن نفك
صدالری متمادی، خشیت آور بر محاربه بی آکدیره جق وجه
ایله ساعتلرجه امتداد ایدیور، دیگر طرفدن عبدالحمید
ظالمك مارشی اوزاقدن اوزاغه عکس انداز اولیوردی.
کیجه ساعت بشه طوغرو اجرا ایدیلن بر آتش، هر کسده
عظیم برهیجان حصوله کتیر مشدی. لیلک ظلام بی نهاییسی ایچنده
ملول و متأثر هیچ بر طرفه قیلدانا میان خلق، بو محاربه
لیلیدنی هیچ بر شیئه حمل ایده میور، فقط ایرتسی صباح
بونك بهیانه بر سروردن عبارت اولدیغنی اکلا اینجه خوف
و هیجانندن نه یاپاچغنی شاشیریوردی.
۹ نیشان صباحی، ینه تفك پاتیردیاریله انفلاق ایتمشدی.

بركون اولكى جناياتك توالى ايتىمىچىكەنە مەطمىن اولان
 خاق مەرددانە ، مەتجىسانە خىلو دلرلە ايلرلەدىكى ائادە
 يانى باشىندە بتون حيوانيەنى اطهار ايدىن بىر نەركە ھىچ بىر طرف
 باقمادىن مەمادىيا ھوايە آتش ايتىدىكى كوزىيوردى . بىمىا بو
 نەرقاقلەلرى اردىنە قارىشان خواجلەر ، او كەندەكى نەركە
 قورشونلرلە تەلف اوليور ، وبوجاغل عاصىلر اردىنە
 پانطالونى دوشمىش ، فەسسىز ، پىر مەردە قىيافەت چوجىقلەر ،
 عاصى نەرقلرلە بىونلرلەنە آسەد قىلرلى تەنكە دىچىكلەندىن
 طومىشلەر ، بىرشوق طىغلانە ايلە ايلرلىيورلردى .

شەركە ھىجرا كوشەلەرنە ، مەكتەبلى خىياطان غەلەنە اجرا
 جىنايتلەر بىر بىرىنى ۇلى ايدىيوردى . جاھىل بىر نەرقە ، سواقاقلە
 تەسادف ايتىدىكى مەكتەبلى بىكباشىنى قورشونلە تەلف ايدىيور ،
 بىرقاچ نەرقە كەنج بىر خىياطى زوجە سەنكە كوزى او كەندە
 پارچەلايوردى . بتون بواختلال ، مەدەنەت ، تەرقىيات فەكرىيە ،
 فەكر حەرىتە قارشى اجرا ايدىيوردى .

بىر ھەرقە افرادىنەك جىنايتلرلى عەقلە خەيرت وىرەجەك
 بىر درجەنى بولمىشى . بىش اون نەرقە ھەتانلەر ، افترالەرلە
 وطنپەرور بىكباشىنى يىقالامىشلەر ، يىلدەزە ، عبدالحمىد
 ظالمك او كەندە كەتەر مىشلردى . عبدالحمىد ، مەظلم ، استبداد آلود

سیاسی ایله پنجره چیتمش ، نفرلری استجواب ایتمش ،
 صوکره بر اشارت ایتمشدی . بوقافله حشرات ایچنده بی
 تاب . صارارمش بر حالده طوران بیکباشی ، آرتق اوندن
 صوکره مددهش بر تعرضه دوچار اولمش ؛ بر نفر ، سونکوشی
 قارننه صاپلامش ، دیکری بینی پارچه لامش ، دیکر بری ده
 بوینه بر ایپ طاقه رق سورو کلیه سورو کلیه کتورمش ؛
 نهایت بیچاره شهیدی آغا جلره صلب ایله مشدی . عبدالحمید
 بوجیع جنایتلردن قطعاً متأثر اولمامش ، آلتونلر ،
 مجوهرلرله طولیدر دینی سراینه کمال سکونته عودت ایله مشدی .
 بیلدیزده بوجنایتلر ایقاع اولوندی فی انشاده ، استانبولده
 (شورای امت) ، (طنین) اداره خانهلری یغما ایدیلیدوردی .
 دیوان یوآدن کچن خواجهلرک ، عسکرلرک ، اسافل ناسک
 النده ، پارچه لامش ، بوروشمش طنین غزتله لری کورویور ،
 عاصی بر عسکر بیوک بر مطبعه ماکنه سی بوکلنمش ، مستر یحانه
 ایلر یلوردی . آرتق هیچ بر نظامدن ، هیچ بر قانوندن
 قورقو قالمامشدی . نفرلر ، غزتله علاوه لرشرایتدیر یور ،
 تصادف ایتدیکی ضابطه شدتلی بر طوقات ایندیردرک جیبندن
 روولورینی غصب ایدیلوردی . اوتوده بر نفر ضابطانه
 پانطالونی چوزدیر یور ، اهلینک بویون باغلرینی قوپاریور ،

قهوه خانه دن رسملری چیقاریور ، غراموفوندن حریت
 پلاقلری قیریوردی . بریده شریعت ایسته ین دیگر برنفر
 میخانه لرده ، عمو مخانه لرده سالاخی براقیور . وحشیانه
 جنایتلر ایقاع ایدیوردی . سوقاقلرده مکتبلی ضابطان نامه
 هیچ برفرده تصادف ایدلیوردی . بواختلال عسکرینک
 قهرمانلری تشکیل ایدن بعض آلایلی ضابطلر ییلاشیق بر
 سیما ، تعلیم و تربیه دن محروم ، قنور بروضیعتله سوقاقلرده
 طولاشیورلر ، قیشله لری میخانه حالنه کتیریورلردی .
 آرتق انضباط محو اولمش ، حریت ایدن کیتمش ، ملت
 رحم و شفقتدن محروم ، آداب دینیه غیر واقف ، پاره
 ایله شریعت ایسته ین نفرلر الینه قالمشدی . غزتلر بتون
 نفر ورقلریله مالی چیقیوردی . بریدن برنفر تسترحقنده
 اخطار نامه لر نشر ایدیور ، اوته دن برچاوش بیچاره بر
 قادینک صاحبلری کسهرک وحشتلر اجرا ایدیوردی . بو
 نفرلر ملتک نظرینه آرتق برر جانوار کی کورونمکه
 باشلامشدی . انسان بونا طبق حیوانلری اللرنده کی سونکولرله
 پارچه لامق ، شهید دوشن ضابطلرک انتقامنی انلردن آلمق ؛
 بو عاصی عسکرلری محو ایتک ایستیور ، اوزمان بتون

قوایی بیتاب و پریشان بر اقان عجز کلی بتون املاری زیر
وزر ایدیوردی .


عبدالحمید بوحالردن صوک درجه ممنون اولیوردی . آرتق
اراده لر ییلدیز منبع استبدادندن صدور ایتمه که باشلامش ؛ عفو عمومی
اعلان ایدلمش ، باب عالی یه مابینجیلر کوندرلشدی . عبدالحمید ، بو
عاصی عسکرلرک آوازه سروری ایچنده ایلک استبداد
سلامتی اجرا ایتمش ، فقط عسکرک عودتی اهالی بیتنده
یکیدن هیجانلر تولید ایله مشدی . استبداد بتون مظالمیه
توالی ایدیور ، ملت و حریت عاصی نفرلرک ید خائنه
سندہ بولونیوردی .

*
* *

استانبول اختلالی طشره لرده غایت عمیق بر تأثر
حصوله کتیر مشدی . استحصال حریت ایچون سنه لرجه
قان دوکن ایکنجی و اوچنچی اردولر بو خبر فلاکتی آلیر
آلماز اورالرده عظیم بر طغیان اشتکا حصوله گلش ، مهد حریت
اولان بو افقلمرک رنگ دلاویز آتشی اوزرنده سونکولر
پارلامغه ، قلیجلر شاقیر دامغه ، قلیلر هیجان وطنپرورانه ایله
اوزون اوزون چار عغه باشلامشدی . وطنک فداکار
اولادلری ینه آیاقلانمش ، ینه اردو سطوت حریت پرورانه


سنی کو سترمکه قیام ایتمش، ینه ملت سوابق ظلم و استبدادك
 قاره . مخوف بلوطلرینی ، مظالم . حیاتسوززندانلرینی،
 یتیم قالان معصوملرک مظلومانه کوز یاشلرینی، شهیدارلان
 ضابطلرک قانلی کفنلرینی، پامل دشمن اولان وطنک فریاد
 استمدادکارانه سنی طویمشدی. وطن، حقیقه نهلمکه ده ایدی:
 بوسنه شرسکک آوستریایه الحاقی حقمنده کی پروتوقول یکی
 تصدیق ایدلمش، فقط بلغارستان استقلالنک تصدیق
 حقمنده کی پروتوقول هنوز امضا ایدلمه مشدی. بلغارستان
 بواختلالدن استفاده ایتک عزمنه دوشیور، بلغار غزته لری
 ممالک عثمانیه ده تأمین آسایشه بلغارستانک مقتدر اولاجغنی
 ایلری سورمه جک درجه ده جرأت کوسترییوردی. فقط
 عثمانیلر بوکا میدان ویرمه مک ایچون الدن کلن غیرتی
 صرف ایدیورلر، روم ایلیده متبادیاً کوکلی قید ایدیور
 لردی. ساحه وطن عظیم برغلیان حیت ایچنده قالمشدی.
 پارسده اکمال تحصیل ایدن کنج لر، دارالفنونلری براقه
 رق اوخری طابورلرینه التحاق ایدیور، عبد الحمیدک
 استبدادینه نهایت ویرمک ایچون عظیم بر حرص وطن پرورانه

ایچنده بولونیوردی . هر کس بشیکده کی یاوروسی ، خسته
 والده سی براقه رق سلاحه صاریاورد . بو شرفه نائل اولاد
 میان کنج مکتبیلر : کوکلی قافله سی کتورن تردنک
 اوکنه یاتیوردی . مناسترده : سلا نیکه ، آرن او دلقده ،
 وطنک همان هرکوشه سنده ، عبدالحمیدک استبدادی محو
 ایتمک : وطنی بوضو ک فلاکتدن قورتارمق ، عثمانیلرک
 بیوک برتبیة سیاسیة ، عظیم برحس وطنپرورانه یی حائر
 بولوندقلرینی جهان مدنیه کوسترمک ایچون شایان تقدیر
 برمسابقه حمیت ابراز ایدیلیوردی . روم ایلیده . بومسابقه
 وطنپرورانه یه فعلاً ممکن اولامادیخی تقدیرده قلباً اشتراک
 ایتمک هیچ بر فرد قالمامشدی . بتون عثمانیلر : تموز
 انقلابنک فاعل ذی قدرتی اولان اردویه التحاق ایدیور ،
 بو اردویی سوق واداره ایدن کنج ، مقتدر : آتشیاره
 حمیت ضابطان اره سنده وطنک بوبیوک کونندن حصه مند
 اولمق بختیاراغنی آرزو ایدیوردی . بر طرفدن طابورلر
 سفر برحاله قونولور ، استانبوله دخول ایچون پلانلر
 ترتیب ایدیلیوردی . دیگر طرفدن کنج ، اختیار ، بتون



حریت اردوسی افرادی

حزبت اردوسی افرادی تستر حالده



اولاد وطن ، حریت اغورنده فدای جان ایچون بتون
صمیمیت قلبیه سیله سلاحه صاریل یوردی . عبدالحمید کینای
استبدادینی ییقمغه ، ملت بو فلاکت مشیخصه دن قورتارمغه
قطعاً عزم ایدلمشدی . ملت ، بو آرزوایله حرکت ایدیور ،
اردو استانبول عاصیلرینک شرف عسکری اوزرینه ایشار
ایله دککری لکینی تمیزله مک ، عثمانلی نامنی پرزیب و شرف
کوسترمک ایچون حرکت ایل یوردی .

۳. استانبول اوکننده حریت اردوسی

حریت اردوسنك حرکاتی - آیاستفانوسده حریت اردوسی -
نشئهلی کونلر - آیاستفانوسده مجلس ملی - مجلس ملی مقرراتی
- حریت اردوسنك استانبول اوزرینه حرکتی - ۱۰ نیسان -
عبدالحمیدك صوك سلامفی - استانبولده هیجان - حریت اردوسنك
استانبوله دخولی .

حریت اردوسنك استانبوله سوقی ایچون مناسترده ،
سالانیکده، بتون اوچنچی وایکنجی اردو منطقه لرنده عظیم بر
فعالیت حصوله کلمکه باشلامشدی . عبدالحمیدك عثمانلی
ملتنه قارشى اوردیغی بوصوك ضربه سالانیکده عکس تأثیر
حاصل ایدر ایتمز، قلوبلرده طوپلانلمش، هیجانلی کوز
یاشلری ایچنده نطقلر ایراد ایدلمش ، عبدالحمیدك بالای
سلطنتندن ملتی ابدیاً خلاص ایچون لازم کلن تدبیرلر
اتخاذ اولونمشدی . مناسترده، سالانیکده، ادرنه ده خارق العاده
بر فعالیت عسکریه حکیم فرما اولیوردی . هر طرفدن

استانبوله شدتلى پروتستولر ياغديريلور ، توفيق پاشا
 رياستنده تشكىل ايدن يكي قابينهك مشروطيته مغاير
 اولديغى سويله نيوردي . ملتك بوصورتله شكائتلر ياغدير-
 مقده ، فريادلر ايتكمده حقى واردى : احمد رضا بك
 بتون صميميت وطنپورورانه سيله ملتة ايفاي خدمت ايتديكي
 بر صر دهه سونكولر قارشيسينده استعفا ايتمش ، قابينهك استعفا سى
 تهديد ايله ، جبراً وقوعه ككشدى . ملت ، بوجبرى معامله
 لره قارشى بتون قوتيله باغيريور ، جاسوسلغك هواى
 فساد آلودى آلتنده ملوث بريزانس اخلاقي ارائه ايدن
 ايدن بوپاي تحقاي قابينهك آلتنده ازمك ، بوولولة استبداد
 ايچينده حس شفقتدن محروم قلبي ، قانلر ، جنايتلرله آلوده
 حياتى ، مخوف ، بويالى سيماسى ايله يكر منجى عصر ده دور
 وحشت و استبدادك هر درلو مظالمنى كنديسنه خاص بر
 طرز غدارانده اجرا ايدن عصر حاضر نه روتنى ملتك
 سرفلاكتندن قالدير مق ايستيوردي .

سلانيكده كي فعاليت جدا خارق العاده ايدى :
 استانبول اختلالى خبر آلير آلنمز بتوك اولاد وطن
 سلاحلارنى ، پنجشنبه كوني اقشامى حركت ايدن عسكرلر
 بيكباشى مختار بك قومانده سنده استانبول اوزرينه

یورو مشلردی. بو عسکرک تشییعی غایت پارلاق اولمشدی: خلق استاسیونه طوپلانمش، بوفداکار عسکرلری آغلایه آغلایه تشییع ایدیوردی. ترن هراستاسیونده توقف ایتدیکجه، چولق، چوجق، ارکک قادین لارنده سیغاردلر، یئشلر بوقهرمان عسکرلری تشییع ایدیورلردی.

مخاز بك معیتنده کی پیشدار جمعه ایرتسی کونی خادم کوینه کلش، نيسانك آلتنجی کونی (یارم بورغازه) قدر مواقعی اشغال ایله مشدی. آرتق عسکر ترن ترن، قافله قافله کلیور، استانبول خلقتک سیماسنده بر نشانه امل حاصل اولیوردی. (خادم کونی) جسیم بر اردوگاه حانه کلشدی. نيسانك یدنجی کونی فرقه قوماندانی حسین حسنی پاشا (خادم کونی) نه کلش، نيسانك سکزنجی کونی قطعاتك (یارم بورغازه) حرکت ایتلرینی امر ایله مشدی.

اوگون حرکت اردوسی قوماندانی حسین حسنی پاشا، ارکان حربیه عمومیه ریاستنه بر تلغرافنامه کشیده ایدیور، استانبول اهالیسنه خطاباً بر بیاننامه نشر ایلوردی. وطنک برات خلاصی حکمنده اولان بو وثیقه لر آتیده کی بیاناتی احتوا ایدیوردی:

حرکت اردوسی قوماندانی طرفندن

ارکان حربیة عمومیه ریاستنه تلغرافنامه

اوتوز اوچ سنه لك مدید و مشئوم بردور استبداددن
 صكره بتون ملت عثمانیه نك غلیان حمیتله استحصال
 واسترداد اولنان مشروطیت بشروع و مزى ینه دست جلا
 استبداده تودیع ایلامك مقصد ملعونانه سیله بیک درلو
 حیل و فسادلر ارتکاب ایتمش و نهایت ظاهراً کویا شریعت
 ایسته نیورمش کی حقیقتده شرع مبین احمدی به کلیاً مخالف
 اوله رق قائل بر احتمال عسکری ایقاعنه سبب اولمش
 بولنان ملعون و وجدان سز طرفداران استبداد ایله بر طاقم
 آلچق و منفور منفعت پرستلرک تلقینات ابلیسانه لرینه
 قایلمش و پایتختك و آماجگاه امت اولان مجلس عالی مبعوثانك
 آل قانلره بویامسنه و ملتك ناصیه پاکنه مشکل الازاله بر
 شائبه سیاه مذلت ایراث ایدلمسنه سبب اولمش بولنان خاصه
 اردوسی افرادیله بحریه و طوپخانه افرادینك حرکات
 واقعه سی آلتیوز سنه لك لک سز برناموس انقیاد و اطاعت
 طاشیمقده اولان مقدس عثمانی اردوسی پك بیوک بر

حجابه دوجار ايتمش وبولمك نك خارق العاده بر سر عتله
 تظهيري امل خيريله آياستفانوس وكوچك چكجه يه گلش
 اولان ايكنجى واوچنجى اردولردن مفرز قوه متظمه
 عثمانيه مستعيناً بتوفيقاته تعالى مقتضاي شرع مابين احمديدن
 اولان قانون منيف اساسينك بعدما هر درلو تجاوز و خلاصه
 وقايه سي و پاي تحت سلطنت سنيده آسايش وامنيته اعاده
 وتحكمي امرنده تدابير مؤثره اتخاذاي ومارتك اوتوز
 برنجي كوني ملت عثمانيه نك اك مشئوم يوم نخوستي حاله
 كتورمكه سبب اولان خفيه لرله ذني الطبع منفعت پرسترك
 جزاي سزالرينك تعييني مقصديله تشبث ايله چكي هر كونا
 اجرا آتده محافظه سربستي ايد بيلمك وبو سايه ده عمانلي
 اردوسنك ناموسني اكمل ايله بيلمك ايچون استانبولده
 بولنان بري وبجري سلاح ارقداش لردن آتيده كي خصوصاتي
 طلب ايدر :

اولا مارتك اوتوز برنجي كونندن اول استانبولده كي
 بري وبجري قطعات وسفائنه مأمور اولان بالمله ارکان
 امرا وضابطانك بتكرار قطعه لرينه اعاده اولمليرينه قطعياً
 ممانعت ايتمه رك بونلرك كافه اوامرینه كوري كورینه
 اطاعت وانقياد كوستره چكلرينه وسياسي ايشلره بعدما

هیچ بر صورتله مداخله ایتیهرك يالكر وظائف مقدسه
 عسكریه لرله مشغول اوله جقلرینه دائر شیخ الاسلام
 وفتوی امینی ودرس وکیلی افندیلر حضراتیله کنندی
 قوماندانلری حضورنده وقرآن مبین و منیف اوزرینه
 اللارینی باصمش اولدقلری حالدہ بر کون ایچنده عموماً
 استانبولده بولنان افراد و کوچك ضابطان یمین ایدہ جکلردر.
 ثانیاً کندیلرینی شریعت ایسته ییکز دیه اغفال
 ایدرك وطنی تہلکہ یه دوشورمش اولان آچقلرك تأدی
 ایچون اردومزجه اتخاذ اولنه جق تدابیر تنکیلیه و انضباطیہ
 قطعياً مداخله ایتیهرك واردومز افرادینه حتی یان کوزله
 بیله باقیہ رق انلری کنندی اوز قردشلری کبی بیله جکلر
 و کندولرینی اغفال ایتمش اولان خفیہ لرله ادانی یینه
 کندو ضابطلرینه اخبار ایلیه جکلردر . بو ایکی طلبمز
 استانبولده بولنان بری و بحری بالعموم سلاح ارقداشلریمز
 طرفندن حسن صورتله قبول اولنه رق اطاعت کامله وجدیه
 ابراز ایلدکلری تقدیرده اثنای اجرا آتمزده کندیلرینه
 قطعياً ایلیشمیه جکی خصوصلرینک افراد مرقومه یه
 اکلایه جقلری لسان ایله اخطار اولنمش و درجه مطاوعتلرینک

سریعاً طرف عاجزی به اشعاری رجا اولانور .

۶ نیسان سنه ۳۲۵

حرکت اردوسی قوماندانی


حسین حسینی

حرکت اردوسی قوماندانی طرفندن

استانبول اهالیسنه بیاننامه

۱. ملت سنه لردنبری اجرای مظالم ایدن قوه
اتبدادی پارچه لیه رق حکومت مشروعه مشروطیه
تأسیس ایتدی، بوقانسز انقلاب مسعوددن متضرر اولان
ادانی، غیر مشروح بر صورتده تأمین منفعت لرینه خادم اولان
حال سابقک اعاده سی ایچون بیک درلو حیل و دسایس
ودنائته مراجعت ایدرک حکومت مشروعه مشروطه مزى
رخنه دار ایتک ایسته دی و بتون عالم انسانیته تلغین
ایلدیکی استانبول فاجعه سنک حدوشنه سببیت ویردرک معصوم
قانلر دوکدی .

۲. ملت حیات واقبالنک کافل یکانه سی اولان
مشروطیتک رخنه دار ایدلک واحکام شرعیه وسعادت



حرکت اردو سنہ مذہب طوحي، بطرہ سنک خانہ دن سروري



حرکات اردوسی قوماندانلرندن حسین حسنی پاشا

وسلامت عمومیه ملیه مزى ضامن اولان قانون اساسیمزك
آياقلا آلتیه آلتق ایسته نیلدیکنی کوردی و بو حرکات
دنانتکارانهك مسبب اصلیرینی تأدیب ایتمک لزومنی تقدیر
ایدرك هیئت عمومیه سیله استانبول اوزرینه یورو مکه قرار
ویردی. ایلك قوه اجرائیه اولق اوزره ایسته بزى،
استانبول سورلری قارشوسنده کوردیککز بو حرکت
اردوسنی بورایه کوندردی .

۳. حرکت اردوسنك مقصد و وظیفه سی . حکومت
مشروعیه مشروطه مزى هیچ بر قوتك صارصه میه جنی
صورته ترصین ایتمک و صرف قوت شریعت غرا ایله
مؤبد بولنان قانون اساسینك فوقنده هیچ بر قانون، هیچ
بر قوت اولدیغنی و اوله میه جغنی اثبات ایلمک و مشروطیت
مشروعهمزك استقرارندن ممنون اولمیان وطن و ملت
خائنلرینه صوك و قطعی بر درس انتباه ویرمکدر .

۴. مظلوم اهالی و بیطرف افراد تمامیه حمایه ایدیله جکدر .
انجق محرکدر، مفسددر و مشارکدر همه حال لایق اولدقلری
تأدیبات قانونیه دن قورتیله میه جقلردر .

۵. هیئت فاضله علمیه سرناج احترام و ابتهاجزدر .
فقط ملعت و تأمین منفعت عادیه و شخصییه مقصدیله یالاندن

گسوة علمیه به بورونه رك دين شريف محمدی بی تزییف
واستخفافدن چکنمیه رك تشمیل مفسدته قالدیشان ، طاقم
خفیه لر، منفعت پرستلر البته مقتضای شرع وقانونه کوره
معامله کورمکدن خلاص ایدیه میه جکدر در .

۶. ملت مبعوثلرینک وبو محترم مبعوثلرک شایان اعتماد
کوروب انتخاب ایتدکلی هیئت وکلانک حیاتلری وقانون
اساسینک کندیلرینه بخش ایلدیکی حقوق و نفوذ
وصلاحتلری تمامیه وکالیله تأمین وسکون وسرور عمومی
قطعیاً استحصال ایدیه جکدر .

۷. سلامت وطن وسعادت ملیه مزك استلزام ایلدیکی
بو اجرا آت عسکریه مز انساننده مملکتک انضباط داخلی
وسکونت تامه سنی وجهلرک محافظه حیات ومالنی تأمین
ایچون هر درلو تدابیرک اتخاذینه توسل ایدلشددر .

۸. محترم سفرا وباجملله مسافرین اجنیه نک بی حضور
اولملرینه میدان ویرلمیه جکدر .

۹. استانبول وقعه فجیه سنده قانلری دوکیلان
شهدانک ارواح معظمه سی قارشوسنده حساب ویرمکه،
دوچار خوف وخشیت اولغه محکوم اولنلر انحق بو
فاجعه خون آلودک فاعلاری، محرک و مشارکلیدر . بو

حقیقی هر کس بیلمی وتلاش وهیجانه قابلمایوب
مستریخ اولمیدر .

۶ نیسان سنه ۳۲۵

حرکت اردوسی قوماندانی

حسین حسنی

حرکت اردوسنك پيشدارى چتالجهیه کلدیکی
کوندن اعتباراً خلق فوج فوج بومقدس اردویی استقباله
کیدییور، نیسانك آلتنجی کونی آیاستفانوسه کیدن تره نلر
محترم اردو افرادینی تحیه کیدن استانبول خلق ایله مالامال
بولونیوردی. استاسیون، سالنیک ژاندرمه بلوکیله اشغال
ایدلمشدی . بوبلوك افرادی میاننده نفر البسه سی کیمش
کنج، مقتدر پیاده ارکان حربیه ضابطلری بولونیوردی،
بوضابطلر ، وطنلرینی استبداددن قورتارمق ایچون درحال
سلاحه صارلمشلر، یوز باشی، قول آغاسی و بیکیباشی رتبه
سنده اولدقلری حالمده بر ملازمك طاقمه التحاق ایدهرك
خارق العاده بر فراغت نفس، عظیم بر حب وطنپرورانه ایله
وطنك امدادینه قوشمشلردی . بونلر تره نندن چیقانلری
ترصد ایدیورلر ، استانبولدن اردونك احوالنه کسب

وقوف ایتمك ، حریت اردوسی افرادی اغفال ایله مك
ایچون كلن جاسوسلری توقیف ایدیورلردی . بوجاسوسلر
اره سنده حییتسز ضابطلر ، وجدانسز خواجهلرده ظهور
ایدیوردی .

آیاستفانوس برمقر حریت اولمشدی . نیسانك یدنجی
کونی مبعوثان ایاستفانوسده انعقاد باشلامش ، کویك
غلبه لکی فوق العاده تزاید ایله مشدی . تره نلر بیکلرجه
خلق ایله مالامال ، آیاستفانوسه قدر کلیور ، قهوه لر ،
غازینولر ضابطلر ، مبعوثلرله مالی بولونیوردی . استانبولدن
كلن مکتبلی ضابطلر ، مکتب شاگردانی ، عمیق بر صفوت
وطنپرورانه ایله کولکلی یازیلیورلر ، حرکت اردوسنه التحاق
ایتمك ایچون عظیم بر تهلك ابراز ایدیورلردی .

حرکت اردوسنك قوتی کوندن کونه تزاید ایدیوردی .
نیسان کونشك پارلاق ضیاری آلتنده بتون رونقی ایله امتداد
ایدن یشیل ، بی نهیاه قیرلره نصب انظار ایدلدیکی زمان ،
اوزاقدن حرکت اردوسی ایلری قره غوللرینك سیاه
کولکه لری کورونیور ، کونشه قارشى پارلایان تفنکرقلبده
برفرح وانبساط حصوله کتیریوردی . بعضاً قرارگاهدن
كلن براركان حربیه ضابطی ، کونشدن یانمش سیاسی ،

اوزامش صقالی، توزلی البسه سیله بارگیرندن اینیور، اوتده
بر آغاجك آلتنده سیروز فرقه سنه، منسوب بر سواری نفرینك
آتلی کزدیردیکی کورولیوردی . بو منظره جداً شایان
تماشا ایدی : اردولرده سنه لرجه بر برینی کورمه یں سلاح
ارقداشلری شمدی بوراده یکدیگرینی اکصیمی حسله
در آغوش ایدی-ورلر، بو جنبش حماسه ایچنده
چارپان کنج، حب وطنله مالی قلبلرنده عظیم بر عزم ظفر
حس ایلورلردی. بونشو و وطنپرورانه ایچنده بعضاً دنی
بر جاسوسك کمال رذالته کتورلدیکی کورولیور، وطنك
بونانکور اولادلری آرتق حیت، صمیمیت، اخوت اوکنده
اولانجه عجز و مغلوبیتنی حس ایدیوردی .

حرکت اردوسی بر عزم قطعی ایله ترتیباتی اتحاد ایلدیکی
صره ده استانبولده عظیم بر تردد حکم فرما اولیوردی .
بعضلری حرکت اردوسنك شهره کیره میه جکنی ایلری
سوریور، بعضلری اردونك وقت مناسبتنه انتظار ایللمسنى
ضعفه حمل ایتك وجدا نسرلغنده بولونیور و بواطمئنان
ایله کویا قلباً متسللی اولویوردی. اردونك شهره کیرمسنى
آرزو ایتینلر حسیات وطنپرورانه سنده شبهه سی اولانلردی؛
بونلر سوابق سیئاتندن بر عذاب وجدانی حس ایدیورلر،

اردونك عدالتدن هراسان اوليورلردى . فقط وطنى
سون افراد ملت، اردويى بتون صميميت وجدانيه سيله
استقبال ايتك ايستيور، اردو ايله برابر استبداددى ده محو
ايتك آرزوسنده بولونيوردى . نيسانك سكرنجى كوني نمر
ايديان بياننامه ، آرق هر كسده بر قوت قلب حصوله
كتيرمشدى . ضابطان ، رسمى البسه لرني لابس اولارق
سوقاقلرده طولاشيور ، خفيه لرك سياسنده اليم بر اندیشه
وملال حصوله كليوردى .

نيسانك طموزنجى كوني حركت اردوسنك ايلرى
قرمغول مفرزه لرى آياستفانوس — خلقه لى خطنى اشغال
ايله مشدى . اردوده عظيم براعتاد ظفر حكم فرماوليوردى .
بتون ضابطان ، شايان تقدير بر فعاليت حيت پرورانه ايله
چاليشيور ، بتون افراد شهره كيرمك ، حيثيت عسكريه ني
پايمال ايدن عاصى عسكر لرى — ونكو ضربه ليله تاديب
ايله مك ايچون بيوك بر حرص و آرزو اظهار ايديوردى .
بر طرفدن عصاته التحاق ايدن دونما افرادينه وطنك تهلكده
بولوندينى اكلاتيلىور ، ديكر طرفدن آياستفانوسده ،
ايلرى قرمغول خطى جوارنده جاسوسلر توقيف
اولونيوردى .

آیستفانوسده مجلس عمومی ملت حالنده انعقاد ایدن
 مجلس اعیان و مبعوثان، مشروطیته اوریلان ضربه دن طولانی
 شدتله پروتستوایدیوردی. آرتق دونما کاملاً الدایدیش،
 زرهلیردن قسم اعظمی آیستفانوس اوکلرینه کلمشدی .
 دونماك حرکت اردوسنه التحاقی استانبول خلقندد عظیم
 برمنونیت حصوله کتیرمشدی؛ فقط بیلدیز قطعاتنك مدافعه
 امانده بولونملری بومنونیتی بدرجهیه قدر ازاله ایدیور،
 نفر سونکوسندن ، ماوزر قورشونلرندن قورتولان خلق
 اندیشه لی، آتسی مبهم برحیات امرار ایلیوردی . اوکون
 محمود شوکت پاشاده سالانیکدن حرکت اردوسنه التحاق
 ایتمش، اردونك استانبول اوزرینه یورومسی قطعاً تحقق
 ایله مشدی .

۱۰ نیسان، جمعه کونی عبدالحمیدك صوك سلامنی
 اجرا ایدیله جکدی. عاصی عسکر لر قافله قافله سلامنه، کیدیور.
 سیای ملتده ظاهری بر ملال حکم فرما اولیوردی. ملت،
 هر لحظه ، هر دقیقه حرکت اردوسنك دخولنه انتظار
 ایدیوردی. اردو بر انتظام فوق العاده ایله ایلریله مش ،
 شهرك اطرافنده، مقری کوی - داود پاشا - کاغذخانه -
 بلومجی چفتلیکی خطنی اشغال ایله مشدی. حرکت اردوسی

شهره درت قولدن داخل اولاجقدی: برنجی قول شمند و فرله
 کوپری و عزیزیه قره غولانی اشغال ایده جك ، ایکنجی قول
 سورلردن داخل اولارق آقسرائ — باب عالی طرفقی
 اختیار ایلیه جك ، اوچنجی قول کاغد خانه — شیشلی —
 بك اوغلی خطنی ضبط ایده جك ، دزدنجی قول ییلدیزی
 محاصره ایلیه جكدی . حرکت اردوسی بوصورتله ترتیبات
 اتخاذ ایده رك حرکت ایتمش ، داود پاشا قیشله سنه طوغری
 حرکت ایدن قول ایلك اول بوقیشله یی اشغال ایله مشدی .
 حرکت اردوسی افرادی داود پاشایه نقرب ایدر ایتمز .
 قیشله ده بولونان عاصیلر مقاومت ایتمك ایسته مشلر ، فقط
 حرکت اردوسی افرادی نك منتظم . مؤثر آتشری قارشیدنده
 مقاومت ایده میه جكلرینی اكلانجه در حال تسلیم اولمشلردی .
 سلاملقدن كلن عسکر قیشله لرینی كاملاً اشغال ایدلش
 بولمشلردی . بونلر در حال حربیه نظارتنه دوئمشلر ،
 بورادن آلابیلدكلری پیاده افرادیله ادرنه قپوسنه طوغری
 قوشه رق فاتح وجوارینی عظیم رهیجان ایچنده براقشلردی .
 حرکت اردوسنه قارشى یورون افراد عاصیه منهزماً
 رجعت ایله دكلری ائاده استانبولده خوف عمومی حصوله
 كشمشدی . ادرنه قپوسنده وقوعه كلن ایلك مصادمه دن



حربیہ ناظر جدیدی صالح پاشا

بی خبر اولان خلق بیوک بر اندیشه ایچنده سوقاقلرده
 قوشیور، دکانلر سامعه خراش بر کورولتی ایله قپانیوردی.
 سوقاقلرده هیجان آور بر ایصسزلق پیدا اولمشیدی.
 ساعت اونبر، هر کس اولرینه قاچش، آرابلر چکلمش،
 نیم بر ظلمت اطرافه استیلا ایله مشیدی. سوقاقلرک بو
 تنهائی فجیعی ایچنده بعضاً مجهول بر شخصک هیجانلر
 ایچنده قوشدیغی کورولیور، عاصی نفرلرک ایکیشر اوچر
 سوقاق باشلرینه طوپالاندقلری منظور اولیوردی. اعلان
 حریتی متعاقب ولوله شادمانی ایچنده چینلایان بوسوقاقلره
 شمدی بر سکون ماتمین استیلا ایله مشیدی. بومظلم، قانلی
 سوقاقلرده آرتق عاصیلردن، جانیلردن بشقه کیمسه
 چکمکه جسارت ایده میوردی.

۴. استانبولده حرکت اردوسی

۱۱ نیشان صباحی - حرکت اردوسنك دخولی - پانغاتی محاربه سی -
باب عالی محاربه سی - تقسیم و طاش قیشله محاربه لری - طرفینك
تلفاتی - افراد عاصیه نك تسلیمی - ۱۲ نیشان، سلیمیه نك تسلیمی -
اداره عرفیه - ۱۳ نیشان، استانبولده مجلس ملی - ییلدیز محاصره -
۱۴ ی - ییلدیزك تسلیمی - عبدالحمیدك خلع قراری - ۱۵ نیشان،
عبدالحمیدك خلعی .

جمعه ایرتسی کونی صباحی ساعت اون بره طوغری
مدهش بر طوپیجی آتشی استانبولك نیم تخمور افقارنده
مدید طنینلر حصوله کتیریوردی . نیشانك لطیف
کونشی آلمده مست و را کد اوویان دکردن هیچ بر
صندال کچمیور ، کوپریدن هیچ بر فردك کچدیکی کورو -
لیوردی . دكرك صاف و مائی سطحی اوزرنده ، تك توك
صنداللك غلطه دن استانبوله کچدیکی کورولیور ، بو
سکونت سحری ایچنده بك اوغلی و تقسیم جهننده
آیلان طویلرك ولوله سامعه خراشی ، مترالیوزلك

سورکلی ، کسکین مداسی ، یایلم آتشرک دورادور ،
 هیجان انکیز کورولتیلری قابده خشیتدن زیاده عظیم بر
 امل خلاص حصوله کتیرییهوردی . اوزاقدن اوزاغه
 ایشیدیلان طوپ ، تفنک ، مترالیوز صدالری قولاقلرده
 بر ترانه حریت حاصل ایدیور ، بالقونلره ییغیلان ،
 پنجره لره طوپلارنان بتون خلق قلیلرنده بر هیجان عظیم
 اولدینی حالده متمادیا بو طرفه عطف صماخ دقت
 ایدیوردی . ارده صره طوپ و تفنک صدالری موقت بر
 انقطاعه اوغرایور ، صوکره سورکلی بریایلم آتشی متعاقب
 سریع آتشی طوپلرک آوازده مهیبی آفاقی ولولهلر ایچنده
 بر اقیوردی . کوپریده سرعتله کچن بر ضابطک قلیچی
 پارلایور ، کچه کلاهی ، غیور نفرلرک آهسته آهسته
 ایلریله دکلری کورولیوردی . بونفرلر ، سرکه چی قولندن
 ایلریله بن عسکرلردی .

سرکه چی قولنی تشکیل ایدن قوت ، درامه طابوری
 ایله سیروز مترالیوز بلوکنندن و بر چوق کوکلیلردن
 مرکبدی . بو قوله منسوب کوکلیلر ۱۰ نیشان اقسامنه
 طوغری مسعودیه زره ایسنندن ۵۷ قدر ماوزر آتشر ،
 عزیزیه قره غولی ایله طوپخانه نك تسلیمنه مأمورا و ایشلردی .

۱۰۰۰ کشتی بی متجاوز اولان بو قوت واپورله سوق
ایدیله جك، طوغریدن طوغری به ریختیمه چیقاریلا جقدی.
فقط او صرده ده هیچ بر واپور بولنه مامسی اوزرینه بو
فکردن صرف نظر ایدلمش، عسکرک استاسیونده طوران
بوش ترنرله سوقنه قرار ویرلمشدی.

قولک آغراغی مقری کوینده بر اقلمشدی. بلوکلرک
هر نصف طاقنه برضابط تعیین ایدلمش، هر ضابط کندی
نصفیله برابر ترنه بینمشدی. ترمنک فنارلری کاملاً
سوندیرلمشیدی.

کیجه نك ظلام بی نهایتی ایچنده حرکت ایدن بوترن
یاریم ساعتده سرکه جی به کلمش، ساعت سکزده بتون
نصفلر ضابطلریله برابر سرکه جی استاسیوننه فیلامشلردی.
بواننده مترالیوزلری محافظه ایتک ایچون بر طاقم بر اقلمش،
برنجی بلوکلر پوسته خانه اوکندن کوپری به طوغری قو-
شمشیدی. دیگر بلوکلر صباحک سیکوتی ایچنده سسز،
صداسز ایلر بلیور، مترالیوزلر کوپرینک محافظه سنه تخصیص
اولنیوردی. آرتق کوپری قیاتدیرلمش، طابورک قسم
متباقیسی نصفله طاقم قولنده، نصفلر تک صره اولمق اوزره
یوزلری کوپری به متوجه، میدانلده طورییور، نصف

طاقتلر قرقر اديم مسافه ايله بربريني تعقيب ايديوردي .
 عزيزيه قره غولنده كي نوبتچيلر اوزاقدن كورونور كورونمز
 عسكرمارش مارشله حركت ايتمش ، نوبتچيلرك اللرندن سلاحريني
 اير آماز قغوشلرمداخل اولمشدي . افراد ، درين براويقويه
 طالمشدي . حركت اردوسي افرادي بوفرستدن بالاستفاده
 سلاحرلي طوپلامش ، افرادي برر برر توقيف ايدهر ك
 بر او طويه حبس ايتمشدي .

عزيزيه قره غولي بوصورتله ضبط اولوندقدنسكره
 قره غوللرك ضبطنه ايكي قول مأمور ايدلمشدي . بر قول
 ريختم اوزرنده بتون قره غوللري ضبط ايديور : تسليم
 اولمق ايسته مينلري ديجيك ضربه سيله زده ليوردى . آرتق
 صباح اولمغه باشلامشدي . افق شرقيدن خفيف برغازه
 نوار ايچنده يوكسه لن پرطروات برنيسان كوئشى ، مرمه نك
 راكدصولرينه ، ليمانك براق سطحلرينه ديده نواز رونقلر
 سرپيور ، خفيف برابر لاجوردى ايچنده منظور اولان
 اسكدار ساحللى . ظلال آلود سايه ليله دكرك سطح صافى
 اوزرينه عكس ايديوردي . حركت اردوسي كوكليلرى
 بوسكونت سحرى ايچنده طوپخانه يه طوغرى ايلريلور ،
 نوبتچيلر برر برر توقيف اولونيوردى . قولك قسم اعظمى

ایله بر مترالوز طوخنجه خانه یه طوغری ایلریله مش : تقسیم
جهته کلن قولك تفنك صدالری ایشیدلمکه باشلامشدی .
شمدی ایکی طرفدن ده آتش ایدیلیوردی . باروت خانه نك
اوست او طه لرینی اشغال ایدن حرکت اردوسی افرادی
ریختم جهته کی استحکام افرادی آتسه طوتیور : عاصی
نفرلر بومؤثر آتشلر قارشیمنده بربر فرار ایدیوردی .
استانبول طرفدن کلن ایکی طوپ : عاصی نفرلره قارشی
اخذ موضع ایله دیکی زمان بلوکلر کاملاً تسلیم اولمش :
سرکه جی قولى وظیفه سنی تمامیه ایفا ایله مشدی .

بواننده باب عالی و تقسیم جهتلری مدهش برطوپ
صداسی : مترالوز کورولتیسى ایچنده ایکلیور : بولوله
انکیز : مهیج صدالر قلبدیه برحس نجات حصوله کتیریوردی .
باب عالی یه طوغری ایلریله یین قول آقسرائدن کلن : فقط
باب عالی ایله عسکر قلوبنه تحصن ایدن افراد عاصیه نك
آتشلرینه دوچار اولور اولماز مدافعه یه قیام ایله مشدی .
صباحلین ایرکندن باشلایان باب عالی محاربه سی برقاچ ساعت
امتداد ایله مشدی . برطرفدن باب عالی یه قارشی تعیین
ایدیلن طوپلرک مؤثر شرابنلری آغا جلری پارچه لایه رق ،
دیوارلری صیره رق باب عالی پنجره لرینی تخریب ایدیور :

دیگر طرفدن عسکری قلوبنه ایدیلن پیاده اتشلیرتون
جاملری شاقیر شاقیر ایندیریور، بومدهش محاربه اتناسنده
سوقاقلرک سکوننی قلبه عظیم بر خوف و خشیت القا
ایلیوردی. تام بوائنده ایدی که، عسکری قلوب اوکنده
طوران برجبخانه آرابه سنه بر مرمری اصابت ایتش، مدهش
بر اشتعال اورته لغی صار صهرق قلوبک پنجره سنی، دیوارینی
تار و مار ایله مشدی. اورته لغی خفیف بردومان استیلا ایدیور،
بودومانک خفیف بلوطلری آتنده حرکت اردوسی افرادندن
دوشن شهیدلر کورولیوردی. باب عالی محاربه سی بر قاج
ساعت دوام ایتش، افراد عاصیه مقاومت ایدمه جکلرینی
اکلا نیجه در حال تسلیم اولمشلردی.

ادرنه قیوسندن استانبوله طوغری ایلیله یین قول،
اک زیاده فاتح جامعندن مقاومت کور مشدی. شریعت
احمدیه یی آت استبداد اتخاذا ایتک ایستین، وطنه
خدمت ایله مکی ذل مسکنته ترجیح ایدن بعض خواجهلر
فاتح جامعنه تحصن ایتشلر، بورادن حرکت اردوسی
افرادینه قارشى آتس ایتشلردی؛ فقط غلیان حمیتله
آتیان ماوزر قورشونلرندن تخلیص حیات ایدمه جکلرینی
اکلا نیجه در حال تسلیم اولمشلردی. بو قول بر انتظام

فوق العاده ايله ايلريله مش، حربه نظارتى تسليمه مجبور
ايتمش، بيهوده يره قان دوکولمسنه مانع اولمشدى .

اك زياده مقاومت معروض اولان قول، شيشلى-بك
اوغلى خطنى تعقيب ايدن قولدى . بوقول شيشلى-بك
مكتب حربه يه طوغرى ايلريله مش، ايلك مقاومت مکتب
حربه جوارنده کي مانثر عسکرلرندن دوچار اولمشدى .
بو قولك ايلريسند سولانيك ژاندارمه لرى بولونيوردى .
ژاندارمه لر تعرضه دوچار اولور اولماز درحال آتسه
باشلامشلردى ؛ بو آتش غایت مؤثر بر صورتده اون
دقيقه دوام ايتمش، افراد عاصيه مانثر ارقه سندن، ارمنى
مزارلنى ياننده کي يولدن فرار ايله مشلردى .

محاربه غایت سریع، فقط صوک درجه مؤثر اولمشدى .
هرکس بو آنى تفنك صدرلرندن خوف و هيچانه دوچار
اوليور، سوقاقلره ياغمور کي مرملر ياغيوردى بر
طرفدن حرکت اردوسى کوکليلرى، کچه کلاهلې، کنج،
مولوى کلاهلې، آق صقاللې، بتون پير وجوان،
اوموزلرند ماوزرلر، يوزلرى حرارت شمسدن يانمش،
بر غيرت خارق العاده ايله ايلريليورلردى . اهاليدن بعضلرى
بو وطن پرور عسکرلره بيسکويلر اکرام ايتمک ايسته يور،



بومباردمان دن صکره تقسیم قبشله سی

فقط عسکر، ضابطہ لک مساعده سی اولاد جہ ہیچ برہدیہ قبول ایتیمہ جکفی بیان ایلوردی .

حرکت اردوسی افرادی . مکتب حربیہ شاگردانیہ برار تقسیم قیشلہ نہ طوغری ایلر بلیوردی . ژاندارمہ لر دہا اول بک ارغلی جادہ لرینی طوتمش لردی . ژاندارمہ لک بر چوغی اردومزک کنج ومقتدر ضابطانندن مرکب دی . بونلر قول آغاسی، یوز باشی رتبہ لرندہ اولدقلری حالہ ہپ نفر قیافتنہ کیرمش لردی . ژاندارمہ لر خارق العادہ بر فعالیتلہ سوقاقلری طولاشیور، راست کلدیکی استجواب ایدیور، سؤ نیتلہ طولاشان خانلری در حال تہ لیوردی . مکتب حربیہ شاگردانک بر بلوکی سفارتخانہ لری محافظیہ مأمور ایدمش ، بر بلوکی دہ تقسیم قیشلہ سی قارشیدینندہ کی قطعاتہ التحاق ایلہ مشدی . پانغالتینک آرقہ سوقاقلرندن تقسیم تعلیم خانہ سی جوارینہ طوغری حرکت ایدن قول سرعتلہ ایلر بلیور، پنجرہ لرہ اوشوشن، مندیلمرینی صالایان قادین، چولاق چوجق بتون خلقلک آل قیشلری ارہ سندنہ تقسیم تعلیم خانہ سنک آرقہ سی آلیوردی . پارہ مقابلندہ شریعت طلب ایدن عاصی عسکر لر حرکت اردوسنہ انقیاد ایتدکلری حالہ بورادن آتشہ طوتولاجقلردی .

حرکت اردوسی افرادی تقسیم قیشله سندن ایدیله جک
 آتشلردن تستر ایتک ایچون تعلیم خانه نک کریسنده آوه
 یایلمش، استنادلر تعلیم خانه کریسنده کی چقه سورلغه
 یراشدیرلمشدی. عاصی عسکرلره اولاتسلیم اولملری تکلیف
 ایدلمش، عدم موافقت جوابی آلیر آلتماز شدتلی بر آوجی
 آتشی باشلامشدی. حرکت اردوسی افرادی طاغنیق
 نظامده بیوک بر مهارت، خارق العاده بر مکملیت ابراز
 ایدی-وردی. دوز و آجیق بر اراضیده، هیچ بر ستره
 موجود اولمادیغی حالده سورونه سورونه ایلریلیورلر،
 قیشله نک پنجره لرینه اولدیریحی بر آتش اجرا ایله دکدن
 صوکره صحراملر پازمقلغه طوغری ایلریلیورلردی.

افراد پازمقلغی طوتار طوتماز تستری قطعی بر صورتده
 تأمین ایتشلر، پنجره لره طوغری شدتله بر آوجی آتشی اجرا
 ایلمشلردی. عاصی عسکرلر بو آتشنه مقاومت ایده یه-
 جکلرینی اکلا یورلر، حرکت اردوسی افرادی اغفال
 ایچون: یاشاسین حریت! دییه باغری یورلردی، حرکت
 اردوسی افرادی بو خائن عسکرلرک سوزلرینه اینانه رق
 ایلریلیورلر، فقط براز صوکره شدتلی بر آتشنه دوچار

اولور اولماز در حال یره یاتیورلردی . آرتق استادلرده
آوجی خطنه داخل اولملاردی .

آوجی آتشی قیشلهك جاملرینی چیر چیورلرینی ارچه
پارچه ایتدیکی ائاده تعلیمخانه کربسه تعبیه ایدیان طو-
پلرک شرانلرلی قیشله دیوارلری اوزرنده جسم رخنه لر
آچیوردی . آرده طوپلرک واسع ، کورولتیلی صدالری
اره سنده ماکنه لی تفنکلرک فاصله سز ، سریع صدالری
ایشیدیلیور ، ماوزرلرک خفیف پاتردیلری بوولوله دهشت
انکیزی اکال ایدیوردی . ساعت درت بچتمده : آتش کس !
قومانده سی تقسیم تعلیمخانه سنده طنین انداز اولیور ،
عاصیلر مذاکره ایتک نیتنده بولوندقلرینی خبروریریورلردی .
ساعت بشی چاریک کچه بتون افراد عاصیه تسلیم اولمش ،
سلاحلرینی برافه رق حرکت اردوسنک امرینه تابع
اولمشدی .

تقسیم قیشله سنده محاربه دوام ایتدیکی ائاده طاش
قیشله ده شدتلی بر صورتده محاصره ایدیلیوردی . بو قیشله ده
الک زیاده مقاومت ایدنلر ، قانون اساسی احکامنه صادق قاله جقلر
ینه دائر قرآن کریم اوزرینه یمین ایتدکلری حالده پاره یه طاپینه
رق یمینلرینی نقض ایدن ، عثمانلی اردوسنده احراز موجودیت

ایله مکه هیچ بر ایاقت کسب ایدمه، این دردنجی آوجی طاه.
 بوری ایدی . بو طاهور ، پیاده آتشرینه قارشى اومتین
 بناداخلنده شدتله مقاومت ایدیور، فقط مکتب حربیه
 تعلیم خانه نه تمیه ایدیان طویلرک مؤثر آتشری بو عاصی
 عسکرلرک قوه معنویه سی صارصیوردی . طاهش قیشله
 محاربه سی حقیقه مدھش اولمشیدی . افراد عاصیه اینی بر
 تعلیم وتریه کورمش اولدقلری جهتله شدتله مقاومت اید .
 بیور ، مؤثر آتش اجرا ایتک اصولنه تماماً واقف
 بوانیورلردی . حرکت اردوسی افرادینک مرملری قیشله
 دیوارلرینه ، پنجره لرینه یا غمور کبی یا غیور ، اصابت ایتدیکی
 طاهشلری پارچه پارچه ایدیوردی .

افراد عاصیه بر طاه فدن تسلیم اولاجقلرینی اشارت ایدیور
 لر ، دیگر طرفدن یانلرینه طوغری ایلر یله این افراده شدتله
 آتش ایدیورلردی . اوزمان محاربه کیتدکجه شدت پیدا
 ایدیور ، شراپنلرک تأثیر مخربی تصادف ایتدیکی دیوار .
 لرده رخنه لر حصوله کتیریوردی . بو محاربه ساعت سکره
 قدر دوام ایتش ، شدتلی آتشر اجرا سی ، جواب برد ویرن
 عاصیلری ده تسلیمه مجبور ایله مشدی .

تقسیم وطاش قیشله محاربه لری ۱۱ نینسان محارباتنک اک

مهم بر صفحه سنی تشکیل ایله مشدی . حرکت اردوسی
افرادینک ، متین دیوار لر کر یسنه تحصن ایدن افراد عاصیه بی
تسلیمه مجبور ایتسی بوافرادک تعلیم و تربیه ده کی اقتدار یی
اثبات ایدیور ، فقط ضابطه سز بر قطعه نک هیچ بر ایشه
یارامدیغنی ده بتون نیا حیلله اظهار ایل یوردی . درت ساعتدن
زیاده امتداد ایدن بو مختلف عمار به لرده مجموع تلفات بر قاج
یوزده بالغ اولمش ، ارکان حربیه بیکباشیسی مختار بکله بر
ایکی ضابطه شهید اولمشردی .

*
* *

ساعت یدی یه طوغری سوقاقلرده تک توك اهالی کور و نمکه
باشلامشدی ، باب عالی جاده سی تدریجاً غلبه لقا لاشیور ،
بر قسم اهالی طوپلرک باب عالی ده کی تخریباتی سیره کیدیور ،
بتون جاده لری حرکت اردوسی افرادی ، ژاندارمه لری
اشغال ایدیوردی . نقطه لرله اشغال اولسان ایصه سز
جاده لر اورته سندن نفر البسه سی ، کیمش ، الارنده ماوزر ،
برخوق کوکلی ضابطلرک کوپری یه طوغری سرعتله
ایلر یله دیکی کور و لیوردی . کوپری دن بر برینی متعاقب
پیاده لر ، بطریقه لر کچور ، قیرمزی سنجاقلرک خفیف خفیف
تموجی قلبه بر سرور نجات حصوله کتیریوردی .

آرتق خالق آقین آقین بک اوغلنه کچمکه باشلامشدی .
 بک اوغلنده بتون دکاتلر قیامش ، قادین ، ارکک آقین
 آقین طولاشیور . اسیر ایدیلان افرادعاصیه قیشله لر اوکنده
 طوپلانیوردی . اوتهدن برارکان حربیه هیئتق توزلرایچنده ،
 تقسیمه طوغری ایلریله یور ، عاصی عسکرلر اطرافنه طوپلانیان
 خلقک آتیشلری اره نده توقف ایدیوردی . مظفر
 اردو ، خلقک آتیشلری اره سنده نشوؤ ظفردن تمامیه
 حصه مند اولدیغی حالده ، یاره مقابلنده وطنلریتی هلاکه
 سوروکلین ذلیل عسکرلر ، سلاحرلی الیرندن آتمش .
 حب وطن حسندن نصیبی اولمایان ضابطلری ذلیل وحقیر
 قافله عصات اره سنه قاریشمش اولدقلری حالده سوقاقلردن
 کچدکجه ، بو عاصی چتدک قربان مظالمی اولمقدن قورتولان
 خلقک سیامنده برعلامت نفرت حصوله کلیور ، بوتون
 خالق بو عاصی عسکرلری نظر تحقیری آلتنده
 ازییوردی . بونلرک اره سنده خواجه ، پولیس وسائر
 ارباب ارتجاعده موجود بولونیور ، انلرک اطرافنده حرکت
 اردوسنک جسور وفداکار عسکرلری پاک ودرخشان ناصیه لری ،
 یارلاق قصا طوره لریله ایلریلیور ، بو وطن خائنلرینی آقشاملره
 قدر بلوک بلوک سوق ایدیورلردی .

آرتق بتون نظردقت ييلدیز محاصره سنه، بو مقرر
استبداده تعلق ايتمشدى. او كيجه هر كس برسكون تام ايجنده
اولرينه چكيايور، ايرتسى صباح ييلدیزك سقو طى خبريله
محفوظ اولق اميدىنى پرورده ايدىوردى. صباحاين هيچ
برغزته انتشار ايتيور ايدى. نيسانك اون ايكنجى كوني غزته
يرينه حركت اردوسنك بياننامه لرى نشر ايدىليوردى.
بر بياننامه ده انضباط دائره سنك مقرراتى نشر اولونيور.
ديكر بر بياننامه ده حركت اردوسنك خلاصه مظفرياتى
مندرج بولونيوردى. ديكر ايكي بياننامه ايسه مندراجات
اعتباريله فوق العاده براهيتى حازر بولونيوردى. بو بياننامه لر
آتيده كي موادى احتوا ايدىليوردى :

اداره عرفيه بياننامه سى

مشروطيت مشروعه اداره مزك مكملأ تأييد و تقويه
سى ايله برابر آتيا ادنى مرتبه دوچار ضعف و تزلزل
اولماسى و وطن مقدس مزله موجوديت مليه عثمانيه
مزك تأمين سلامت و بقاسى اسبابنك استكمالى ضمننده بو
كره مباشرت اولنان حركت عسكريه عون و عنایت

حقله رهین موفقیت اولمش و بونک نتایج حسنه و خیریه
 سنک افتطافی و مشروطیت مقدسه مزک متین بر صورتده
 تأسیس و تقویه سی فوق العاده حائز اهمیت اولان پای تحت
 آسایشنک استحصال و ادامه سنه منوط و موقوف بولنمش
 اولدیغندن بو کوندن اعتباراً اسنانبول و بلاد ثلثه ایله ذمید
 و چتالجه سنجاقلرنده و اطهر و بکقوز و قارتال و ککبوزه
 قضالرنده اداره عرفیه نک اعلان و تطبیقنه قرار ویرلدیکی
 و بناء علیه بوضعه محل آیش الذوفاق بر حرکت اداره
 عرفیه جه پک آخر مجازاتی مستلزم اوله جغندن هر کسک اکا
 کوره کمال بصیرت و انتباه اوزره حرکت ایلمسی لزومی
 اعلان اولنور .

اوچنجی اردو و حرکت اردوسی قوماندانی

برنجی فریق

محمود شوکت

*
* *

جراند محلیه و اجنبیه دن اکثریسی حرکت اردوسنک
 اتحاد و ترقی جمعیتله مناسبتده بولندیغنی درمیان ایدیورلر.
 بوفکر و مطالعه تمامیه خلاف حقیقتدر. عموم عثمانی اردو



حرکات اردوسی قوماندانلرندن علی پاشا

لری، کافل فوز ونصرت عثمانی اولان اداره مشروطه نك
 محافظه سی نامنه عهد وميثاق ايتمش اولملری حسیله
 اخیراً استانبولده وقوعه کلن تشبثات ارتجاعیه بی احما
 وبیان دولتی ترصین املیه بالاتفاق مستعیناً بتوفیق
 تعالی استانبول اوزرینه براردو سوق ایتشلردر . بواردو
 نك قوماندانلریله ضابطان وافراندن هیج بری هیج بر جمعیه
 و فرق سیاسیه دن هیج بر یسنه منسوب دکلردر . اساساً
 سیاسیات دولته مداخله لری قطعاً جائز اولیان ضابطان
 وافراده عسکریه عثمانیه یالکزمافوقلری طرفندن آلدقلری
 اوامری حرفی حرفه اجرا ایدهرک بشقه هیج بر قوتك
 تحت نفوذ وتأثیرنده بولنمیه جقلر وعکس حرکتی ثابت
 اولانلر قانوناً تجزیه ایدیلر جکلردر . بناءً ~~عیه~~ حرکت
 اردوسنك بر جمعیت خفیه ویا جلیه منسوبیتی وبا خصوص
 اردونك عرمانکی بر تأثیر تحتده حرکت ایتکده بولندیغی
 حقه کی مدعانك کلیاً اصل واساسی اولدیغی اعلان و اخطار
 اولنور . ۱۲ نیشان ۳۲۵

اوچنجی اردو و حرکت اردوسی

قوماندانی برنجی فریق

محمود شوکت

خلق، بویکی بیاننامه نك مواعید سلامت بخشاستمدن
فوق العاده محفوظ اولیور . فقط بتون نظر دقتی ییلدیز
محاصره سنه عطف ایدیوردی . اوکون سلیمیه قیدشله سی ده
بلا محاربه تسلیم اولمش ، بك اوغانك طوپه طوتولا جفی .
سلیمیه نك تسلیم اولیه جفی حقنده کی شایعه لرده اورته دن
قالقه شدی .

نیسانك اوز اوچنچی کونی ییلدیز محاصره سی کتدیجه
شدت پیدا ایدیوردی . بتون مات عبدالحمیدك خلعه
انتظار ایدیور ، مبعوثان دائره سنده انعقاد ایدن مجلس
ملینك مقرر اتنه کمال اهمیتله دقت ایدیوردی . هر طرفه
مختلف شایعه لر دوران ایدیوردی . ملتك یکانه املی
عبد الحمیدك خلعی ایدی . بواملی عقیم براقه جق برروایت
شایع اولور اولماز بتون سیالرده بر علامت مأیوسیت حصوله
کلیوردی .

بواننده ییلدیزی احاطه ایدن خط محاصره کتدیجه
تقرب ایدیور ، عبدالحمید هینچ براندیشه ، هیچ بر خوف
ارائه ایتیموردی . بر طرفدن سرایك خفیه لری ، تفنکچیلری ،
آغلری آراهه آراهه طاشینیور ، دیگر طرفدن صو وغاز
بورولری کسلیوردی . خارجه کی الکتریک ماکنه لری

کاملاً طور دیرلمش ، سرایه ارزاق و مأکولات ادخالی منع ایدلمش ایدی .

بازار ایرتسی کونی ایشامی سرایدن یوزلرجه قادینلرک فریادی ایشیدیلیوردی . بونلر سرایک هجوم ایله ضبط ایدیله جکنه ، کندیلرینک عسکر الینه دوشه جکنه ذاهب اوایورلر ، حرم آغلری ، یاورلر ، سائر آغلر فوق العاده دوچار هراس اولیورلردی .

کیجه ، محاصره ختمده عظیم برفعالیت حاصل اولمغه باشلامشدی . محاصره خطی کتدکجه تقرب ایدیور ، پیاده و طوپچی حاکم نقطه لری اشغال ایدیوردی . بوصرده اورتلق آغارمغه باشلامش ، مرمره نك سطح پرسکونی اوزرنده برانشعاع نظر فریب حصوله گلشدی . کونش اسکدار تپه لرندن طوغمق اوزره بولنیور ، فخرک ایلك رنک آتشینی سونکولر اوزرینه میال زوال لمه لر سرپیوردی . بواثناده سرایک ایچنده عظیم براندیشه حاصل اولیوردی . باش کاتب جواد بکله مابینجی نوری پاشا عبد الحمیده آرتق تردد ایده جک زمان اولمدیغنی سویلیورلر ، ییلدیزک ضبط ایدیله جکنی قطعی برصورتده اخبار ایدیورلردی . عبد الحمید بوصوک دقیقه لرده بیله برچاره نجات تحری ایتمش ، فقط بتون

جنایتلرینک صوک دقیقه لری حلول ایتدیکنی اکلاینجہ :
عظیم برعجز و بی تابی ایچنده راضی اولمشدی .

عبد الحمیدک بو موافقتی اوزرینه سرای داخلنده کی
عسکرلر برربرر تسلیم اولیور . سرای باغچه سی ایله حولیسی
حرکت اردوسی ضابطائی طرفندن اشغال اولنیوردی .

عبد الحمیدک خلع قراری صالی کونی صباحی مجلس
مبعوثان و اعیان طرفندن صورت قطعیده ویرلمش . بو
بابده لازم کلن فتوی بر سرعت فوق العاده ایله احضار
اولونمشدی . بو فتوی عبد الحمیدک بتون جنایتلرینی احتوا
ایدیوردی :

فتوای شرعی

امام المسلمین اولان زید بعض مسائل مهمه شرعیه یی
کتب شرعیه دن طی و اخراج و کتب مذکورده یی منع و
خرق و احراق و بیت المالدہ تبذیر و اسرافله مسوغ
شرعی خلافنده تصرف و بلا سبب شرعی قتل و حبس
و تغریب رعیه و سائر کونه مظالمی اعتیاد ایلد کدن صکره
صلاحه رجوع ایتک اوزره عهد و قسم ایتمش ایکن یمینده
خانت اوله رق احوال و امور مسلمینی بالکلیه مختل قیله جق

فتنه عظیمه احداننده اصرار و مقاتله ایقاع ایتمکله منعه
 مسلمین زید مزبورک تغلبنی ازاله ایتمکله رنده بلاد اسلامیه نک
 جوانب کثیره سندن مزبوری مخلوع طانید قلیینه دائر
 اخبار متوالیه ورود ایدوب مزبورک بقاسنده ضرر محقق
 وزوالنده صلاح ملحوظ اولغین زید مزبورده امامت و سلطنتدن
 فراغت تکلیف ایتمک و یا خلع ایتمک صورتلرندن هانکیسی
 ارباب حل و عقد و اولیای امور طرفندن ارجح کوریلور
 ایسه اجزاسی واجب اولورمی ؟

الجواب

اولور.

کتبه الفقیر

السید محمد ضیاء الدین

عفی عنه

فتوای شرعی صادر اولور اولماز عبد الحمیده خلع
 قرارینی تبلیغ ایچون بر هیئت کوندرلمشیدی. هیئت، اعیانندن
 عارف حکمت، پاشا، آرام افندی، مبعوثانندن اسعد پاشا
 و امانوئل قره صو افندیدن مرکبیدی. هیئت بیلدیزه کلیر

گلز ژاندرمه و پولیس مفتشی میرالای غالب بکی بولمش ،
 غالب بک ده باش کاتب جواد بکه مراجعت ایدرک هیئتک
 عبدالحمیدی کورمک ارزوسند، بولوندیغنی تبایغ ایله مشدی .
 جواد بک ، عبدالحمیددن آدینی مساعده اوزرینه هیئت
 ایله برابر چیت کوشکنک حرم دائره سنه کلمش ،
 اوزمان حرم قیوسی قاپانمشدی . هیئت دائره نک آلت
 قاننده بر اوطیه داخل اولدینی ائنده عبد الحمید آیاقده
 طور بیوردی . اوطیه متعرد قولتوقلر، جسم بر آویزه ،
 ایکی بیوک آینه، اوزرنده بر بطانیه بولونان اوزون بر قولتق
 بولونیوردی . عبد الحمیدک یاننده اوغلی عبدالرحیم افندی
 بولونیور ، غالب بکه جواد بک ، یدی سکر حرم اغاسی ،
 اوچ بش خدمه اوطیه قیوسنده طور بیورلردی . هیئت
 اوطیه کیردیکی زمان ایچریده قادینلرک فریادی ایشیدیلیور ،
 عبد الحمید اوتوز اوچ سنه لک مشاغل غدارانه سندن بیتاب
 بر حالده آیاقده بولونیوردی . عبد الحمید سیاه بر چاکت کیمش ،
 اوزرینه بر پاردده سو آلمش ، پاردده سونک دوکمه لرینی کاملاً
 ایلیکله مشدی . عبدالرحیم افندی ایسه یاننده ، سیویل بر
 البسه کیمش ، ایکی الی کوکسند، احترامکارانه بروضعیت
 آلمشدی .

هیئت او طهیه داخل اولور اولماز اسعد پاشا عبدالحمیده
برخطوه قدر تقرب ایدرک عسکرجه بر سلام ویرمش ،
بمده شو صورتله خطاب ایله مشدی :

— ملت مجلسی طرفندن مأموراً کلدک ، فتوای
شریفهیه مبنی ملت سنی خلع ایتدی . تبایغ اییدیورز . مع
هذا حیاتکزه اولاد و عیالکzk حیاتی امیندر .

اسعد پاشانک بونظمی ، عسکرانه تبلیغاتی ختام بولور
بولماز عبد الرحیم افندی قنایهیه قیانهرق فریاد اییدیور ،
هنچقره هنچقره آغلا یوردی . اسعد پاشاینه عسکرجه
برتمنا ایدرک هیئتله برابر چکلکمک اوزره ایکن عبدالحمید
مستمندانه برطور ایله هیئتک ارقه سفندن باقیور :

— بعض افاداتم واردر . مساعده ایدیکز ، کیتمیکز .
بنی بوراده یالکz براقاییکز . صوکره یارین نه بن سزی کوره
بیلیرم ، نه ده سز بنی . حیاتم امینمیدر ؟

دیور و یالور ایوردی .

عبدالحمیدک اصراری اوزرینه اسعد پاشا تکرار کری
دو نمش ، عبدالحمیده :

— عثمانلی ملتی نجیبدر ، اصیلدر . اونلر بر پادشاه
معزوانه نه یایمق لازم کلدیکنی بیایرلر . تکرار اییدیورم :

جانکز ، اولاد وعیالکزک حیاتی امیندر .

جوانی ویرمشدی .

عبد الحمید متصل نفسی محافظه چالشیور :

— بنی بوراده براقه بیکر . چراغان سراینه کیده یم .
بورادن اورایه باغچه دن کیدیله بیلیر . عائله می باغچه دن کتور یرم .
یالکز آره مزده قاج کوچ واردر . صلاح الدین افندی
چراغاندن چکیلسین . برده بنم برکوشکم وار . کندم
یادیرمشم . معهود کمال الدین پاشا ضبط ایتدی ، دعوی
ایده جکدم . وقتی کله مشدی .


دیوردی . عبد الحمید بوسوزلری سویلرکن چکه سی
تره یور ، بکزی فنا حالد اوجش ، غصه بانه ، قورقونج ،
برسیا ایله سوزنده دوام اییدیور :

— بن ذاتاً ایشک بوبله اولاجغنی بیلیوردم . برادر می
اوتوز اوج سنه صاقلادم . اوده بنی محافظه ایدر ظن ایدرم .
دیوردی .

فقط اسعد پاشا عبد الحمیدک جنایتلرینی
ستر ایچون سویله دیکی بوسوزلره قطعاً اهمیت ویرمه مش ،



شهید حریت بیگباشی مخار بك



گندیلرینک یالکز خلعی تبلیغہ مأمور اولدقلرینی قیصہجه
افاده ایلمشدی .

هیئت قیودن چیقدیغی زمان ، عبدالحمید ، سلطنت
مستبدانه سنک صوک دقیقه لرینی حدتله ، عصبی هیجانلر ایچنده
کچیریور ، حرم طرفندن چیقان آجی آجی فریادلر توکلری
اوپر تیوردی .

۵. جلوس شنکری، عبدالحمیدک تبعیدی

۱۴ نیشان - جلوس تدارکاتی - حربیه نظارتی میدانده، -
محمدر شاد افندی حضرتلرینه تبلیغ جلوس - تاجدار جدیدک
حربیه نظارتنه ورودی - رسم بیعت - جلوس طوپلری -
عودت شاهانه - ۱۵ نیشان کیبجه سی - جلوس دونمایی -
عبدالحمیدک سالانیکه اعزامی - ملنک خلاصی .

۱۴ نیشان صباحی عبدالحمیدک خلعی حوادثی اطرافه
شایع اولور اولماز ملت کنیش برنفس آلمشدی. کیمک
سیماسنه عطف نظر ایدلسه، برهفته لک انقلابک، متمادی
تفننک کورولتیلرینک، قانلی و غدارانه جنایتلرک تأثیریله
حصوله کلن ملال انکیز اصفرا ره بدل شمیدی برلمعه نشاط
حصوله کلیور، ملت عبدالحمیدک فلاکت ساطعتندن خلاص
اولمقدن متولد بر سرور فوق العاده اظهار ایدیوردی .
آرتق سنه لر دن بری دوش بدبختی ملتده عظیم بر بار طاقتفرسا
حالنده حکم فرما اولان کابوس مشخص اورته دن قالقمش،

ملت پرور سعادتی کورمک سعادتنه نائل اولمشدی .
 عبدالحمید خلع ایدلمش ! بوتبشیر ، قلبده او یله فرح
 وشادی حصوله کتیریوردی که ، بونی هیج بر مسرتله ،
 هیج بر سعادته مقایسه ایتمک قابل دکلدی . بوسرور بتون
 ملتک سروری ، بوسعادت بتون ملتک سعادتی ایدی . الله !
 اونه مسعود ، نه مبارک بریوم شادی ایدی ! خلق فوج فوج
 حربیه نظارتنه کیدیور ، یکدیگریله کوروشن ایکی
 ارقداش متبسم ، نشئه دار برسیما ایله بو بشارت عظمادن
 بحث ایدیور ، قلبلر بر هیجان سرور ایچنده ضربان
 ایلیوردی . عبدالحمید خلع ایدلمشیدی ! ملتی سنه لرجه ازوب
 محوایدن بو وجود مظالم الود آرتق صحنه سیاسیاندن ابدیاً
 چکلمشدی . بویوم خلاص ، عثمانلیلرک ال بیوک برکونی ،
 اک مسعود بریوم سعادتی ایدی !

حربیه نظارتنده کی حاضر لقلر قلبده عظیم بر حظ
 و سرور حصوله کتیریوردی . بر زمانلر ، عبدالحمیدک
 محافظه استبدادی ایچون بسله دیکی نانکور عسکرلرک جمع
 عصیانی اولان بومیدانده ، شمعدی رسنه طابوری ملی
 البسه سی ، بیاض کلاهلری ، توپلی چپکنلری ، مردانه
 طورلریله عرض اندام ایدیور ، استحصال حریت ایچون

جانی فدا ایدن بو قهرمانلر قلبدہ عظیم بر حرمت تولید
ایدیوردی . اوتہدہ یشیل ، نظر فریب چنلر اوزرنده
حرکت اردوسی طوہجیلرینک بیاض چادرلری منظور
اولیور ، ارہدہ صرہدہ امرکتین برنفرک توزلرایچندہ آت
قوشدیردینی کورولیوردی . سلطنت قپوسنک ایچ طرفہ
برچوق کنج ضابطلر ، الارندہ ماوزر ، قهرمان کوکلایلر
طوپلانمئس ، بویوک کونک بتون سوابقنی نقل ایدیور ،
طیشاریدہ بیغین بیغین کلن خلقلک ، سرعتلی سرعتلی قوشان
بارکیرلرک ، آرابہلرک کورولتیلری ایشید یلیوردی . بر
طرفدن سوقاقلر یاراقلرلہ دونادیلیور ، دیگر طرفدن حربیہ
نظارتی میدانندہ کی بطربہ : ملنہ عبدالحمیدک استبدادندن
ابدیاً خلاص اولدیغنی مدید طراقلرلہ تبشیر ایچون
فوق العادہ حاضرلقدہ بولشیوردی .

سلطنت قپوسندن حربیہ نظارتی دائرہ سنک بایزید جامع
شریفہ ناظر قپوسنہ قدر امتداد ایدن میدان اوزرنده ، صاغ
طرفدہ رسنہ ملی طابوری ایلہ ایکنجی اردو سواری افرادی ،
صول طرفدہ اوچنجی اردو طوہجیلری ایلہ حریت اردوسی
افرادی اخذ موقع ایتشلردی .

ساعت یدی یہ طوغری اعیان ومبعوثان اعضاسی

حریبه نظارتہ کلیور ، ایکی صرہ تشکیل ایدن افراد
 ارہ سندن دردر بشر مبعوثك كچدیکی کورولوردی .
 محمد رشاد افندی حضرت تلرینه تبشیر سلطنت ایچون بر هیئت
 مبعوثہ کوندر لمشدی . هیئت مبعوثہ طولہ باغچہ سراینہ
 کلہرك رشاد افندی حضرت تلرینه عرض معلومات ایتمش ،
 براز صوکرہ رشاد افندی حضرت تلری صالونی تشریف ایله
 مشدی . رشاد افندی حضرت تلرینه ملتك کندیلرینی مقام
 سلطنتہ اجلاس عزمنده بولندیگی ، براز صوکرہ بر
 هیئت کلہرك کندیلرینی آلاجنی ، بناء عالیہ اعتدال اوزره
 حرکت ایتلری بیان اولمش ، رشاد افندی حضرت تلری
 جواباً شو مطالعہده بولونمشدی :

— اوتوز اوچ سنہدر اعتدالمی محافظہ ایتدم . بو
 مدت ظرفندہ دائماً ملتك - اامت وسعادتنہ دعالر ایتدم .
 مادام کہ ملت بنی آرزو ایدیور ، مع النشکر بو خدمتی
 قبول ایدرم . برنجی االم شرع شریف وقانون اساسی
 موجبہجہ اجرای حکومتدر . ملتك آرزو وآمالسندن ذرہ
 قدر انحراف ایتتم . جناب حق موفقیت احسان ایدرسہ
 بختیارم .

صوکرہ ، هیئتك نہ زمان کلہجکفی ، کندیسینی نرہیہ

کوره جکفی سئوال ایتش ، هیئتک یارم ساعتہ قدر کله جکی
وکندیلر نی بیعت ایچون حربیه نظارتنه کتوره جکی بیان
ایدلمشدی . فی الحقیقه یارم ساعت صوکره کلن هیئت ، رشاد
افندی حضرتلرینی آلهرق طولمه باغچه دن حرکت ایتش ،
طوپخانه دن آتیلان طوپلر بتون ملتک قلبنده برسرور
وشادمانی حصوله کتیرمشدی .

*
* *

شهریار جدید غازی احمد مختار پاشا ایله برابر بر
استمبوطه راکب اولمشدی . بواسطه مطی دها بر قاج استمبوط
تعقیب ایدیور ، واپورلر بایراقلرله دونانیور ، بتون سفینه لر
راسمه سلامی ایفا ایدیوردی .

استمبوط سرکه جیه واصل اولدینی زمان حربیه شاگر
دانی طرفندن استقبال ایدلمشدی . ناجدار جدیدک بتون
وطن قهرمانلری اره سنده بشوش و متبسم برسیا ایله
کچدیکنی کورن خاق نشوه لرندن اللارینی چیرپیور ، چوق
یشا آوازه سی هتادی بر صورتده عیوقه ایصال ایدیلیوردی .
ساعت سکزی یکرمی کچه حربیه نظارتی میداننده
طنین انداز اولان حاضر اول بوروسی اوواسع میدانده
عظیم بر فعالیت حصوله کتیرمشدی . رسنه قهرمانلری

در حال حاضر اول وضعیتی آلبور ، (سلام طور) بوروسی
اوزرینه بتون سلاحر بر سرعت فوق العاده ایله سلام
طور وضعیتنه کتیر یلیوردی .

آرتق هرکس ، تاجدار جدیدك ظهورینه صبر سزلقله
انتظار ای دیوردی . بوانتظار صمیمانه ائناسنده ای دی که
مکتب حربیه سواری شب کردانی بر رفتار سرایله سلطنت
قپوسندن حربیه نظارتنه طوغری ایلر یلیور ، صوکره
منتظم بر چرخ حرکتی یاپه رق صاغ طرفده ، رسنه ملی
طابورینك ارقه سنده اخذ موقع ای دیوردی . بواننده
شهر یار جدیدك سیاه ، ساده بر قوپه آرابه سی ایچنده بیاض
کلاهی کوکلایلر ، رسنه قهرمانلری اره سنده آهسته
آهسته ایلر یله دیکی کورولیور ، بتون یورکلردن تتره
برصدا ایله چیقان چوق یشا آوازه سی ایشیدیلوردی .
بوصدا متوالی ، صمیمی بر صورتده عکس انداز اولیوردی .
بو آلاهی حقیقه ملی ، صمیمی بر آلایدی . پادشاه ،
ساده بر آرابه ایله ملتی اره سندن کچور ، ملت سفر بر
قیافتی ، ملی البسه سیله پادشاهی استقبال ای دیوردی .
ذات شاهانه حربیه نظارتنه داخل اولدقلری ائنده بتون
ارکان ، امرا و ضابطان سونجکلردن لارینی چیر پیوردی .

شهریار جدید ، سیاه بر پاردسو کیمش ، باشند قیرمزی
برفس ، سیای بشوش و منور یله مردیونلردن چیقور ، بتون
ضابطان صمیمی : سورکای بر صورتده ال چیرپه رق محترم
قوماندانلرینی ایتقبال ایدیورلردی .

ذات شاهانه دائره فاخره بی تشریف ایتدیکی صروده
موزیقه وطن هواسنی ترنم ایدیورلردی . بر طرفدن غایت بایغ
پردعا او قونیور ، بتون حاضر و ن بودعایه کال صمیمیتله آمین
خوان اولیورلردی . دعائک ختامده سلطان محمد رشادخان
خامس حضرتلری بر طور بشوشانه ایله حضاره خطاب ایتمش :
آئیده کی نطق ایراد ایدیورلردی :

— حق مزده اظهار اولنان حسن قبول عمومیه بدن
طولای چوق تشکرلر ایدرم . اصل حریتک ایلک پادشاهی
اولدیغمدن طولای مفتخرم . بدن صوکرده کان ایکنجیسی
اولا جقدر !

صوکرده ، رسم بیعت غایت پارلاق بر صورتده اجرا
ایدیلیورلردی . موزیقه وطن هواسنی ترنم ایدیور ، طولر
کورل کورل آتیلیورلردی . بو ترانه حریت هر کسده عظیم
بر سرور و ابتهاج حصوله کتیریور ، بتون مبعوثان .
اعیان و ضابطان یکدیگرینی متبسمانه تبریک ایدیورلردی .



حریت اردوسنک استانبوله صورت دخولی



آرتق رسم بیعت ختام بولمش، شهریار جدید مظفر
 عسکرلرک آوازۀ تجیلاتی ارمه‌سنده عودت ایدیور،
 خلقک سرورینه پایان تصور ایدیلهمیوردی . کردونه
 پادشاهی، دیوان یولندن طوقیویه طوغری آهسته آهسته
 کچدیکی ائناده آقیشلر، نشئه‌لر هر طرفده برسور خلاص
 وجوده کتیریوردی .

ذات شاهانه خرقة سعادتیه زیارت ایتیش، ساعت
 اون بر بچقده بغداد قصرندن طولمه باغچه سراینه عودت
 ایلمه‌شدی .



او آقشام هرکسک قلبنده عظیم بر مسرت حکم فرما
 اولیوردی . دونما تدارکاتنه کمال فعالیتله غیرت اولونیور،
 عبدالحمیدک ظلم واستبدادنن خلاص اولان ملت، عظیم بر
 سرور و ابتهاج ایچنده بولونیوردی . بر طرفدن اعرن
 شادمانی ایچون هر طرفدن سلاح آنیلیور، دیگر طرفدن
 خلق سرورینی، سعادتیی اظهار ایچون نه یاپه‌جغنی
 شاشیریوردی . بو سرور و شادمانی کیجه‌لره قدر امتداد
 ایتیش، اوکیجه شهرک هر طرفی پارلاق بر صورتده
 تنویر ایدلمشدی . بو تنویرات ایچنده هرکس خرم و

شادان بر آتی پر سعادته حاضر لانیور، دور مشنوم حمیدینک
 ابدیاً ختام پذیر اولسندن متولد بر نشوؤ فوق العاده ایچنده
 بولونیوردی . اسکدار ساحلارنده ، چاملیجه تپه لرنده .
 بك اوغلی جاده لرنده کی تنویرات نظره بر مژده سعادته
 کولومسرکن ، ییلدیزك شعله استبدادی ابدیاً سونمش
 بولونیوردی . بو ائنده ، ییلدیز جاده سنك ظلام پرسکونی
 آره سندن کچن ایکی سوار ی بلوکی ایله ایکی زرهل ی
 اوتوموبیل ، سرایك بیوک قیوسی اوکنده بکلیوردی .
 آرتق نصف اللیل اولمش : ساعت قله سنك مدیده اوغولتیلی
 طینلری او ایصسر بنالر ایچنده عکس انداز اولمغه باشلامشدی .
 بو ائنده حریت اردوسی افرادندن دوت ضابطه باغچه نك
 قوملی طرحلری اوزرندن ، منتظم ، ظلال آود چاملر
 اره سندن چیت کوشکنه طوغری ایلریایوردی . بو هیئت ،
 عبدالحمیده حرکت اردوسی قوماندانلغنك صوك قرارینی
 تبلغ ایده جکدی .

هیئت ، چیت کوشکنه داخل اولدینی ائنده عبدالحمید
 حرمده ایدی . حرمدن برچوق فریادلر : آغلایشلر ایشید-
 یلیوردی . عبدالحمیده باش کاتب طرفندن خبرویریلیر ویرلنر
 طیشاری چیقدی . بکزی صارارمش ، سیاسی هیجان آود ،

هان تترهیه تترهیه یورو یوردی . عبدالحمید ، اوراده ، بر
قوتوغه او طوردی . هیئتدن بر ضابط ، عبدالحمیده طوغری
ایلریلیه رك دیوان حرب عرفی طرفندن ویریلن قرار
موجبجه کندیسنك سلائیكده اقامت ایده جکئی تبلیغ ایتدی .

عبدالحمید بر دنبره دوچار تلاش اولارق :

— نه زمان کیده جکم ؟

دیهه صوردی . ضابط :

— هان شمدی افندم ، هرشی حاضر در !

جوابی ویردی .

بو حوادث عبدالحمیدی عظیم بر خوف و دهشته
دوچار ایتدی . هان اوراده بابیلاجق بر حاله کلدی .
یالواردی ، حرمه کیدوب طیشاری چیتمامق ایسته دی .
بو مناقشه بر ایکی ساعت دوام ایتدی . نهایت هیئتك
یاننه کلدی . کندیسنك چراغان سمراینده براقلمسی ایچون
رجار ایتدی . فقط بو قرارك دیکشمسی غیر قابلدی .
عبدالحمید اوزون بر سکوتدن صوکره جواب ویردی :
— باری حیاتم محافظه ایدیله جکمی ؟ حیاته بر شی

اولاجقسه ، بوراده اولسون !

اوزمان ، بر چوق حیاتلری محو و پریشان ایتکدن

چکینه‌مین ، محافظه حیاتی ایچون ملتی نیجه اسارت آلتده
ایکله تن بوییلر منزویسنه ، حیاتنک محافظه ایدیه جکی
صورت قطعیه ده بیان ایدلدی . عبدالحمید ، متردد ، مایوس
برسیا ایله :

— اوت ، هپ بویله سویلیورلر؛ یا صوکره ...
دیدى . سوزینی بیتیرهمدى . فقط اوراده حاضر
بولونان عبدالرحیم افندی ایله باش کاتب ، بووعدک طوتولوب
طوتولیه جغنی بلکه اون بش دفعه سئوال ایتدیلر . نهایت
عبدالحمید کوزلرندن یاشلر آفرق :

— اجدادمدن هیچ برینک دوچار اولمדיغی برجزایه
بنی نصل لایق کوریورلر ؟ دییه باغیردی .
فقط هیچ دوشونموردی که اجدادندن هیچ بری ملتنک کوز
یاشلری ، معصوم قانلری ایچنده ادامه استبداد ایتمه مشدی . هیچ
دوشونموردی که ، محاربه میدانلر نده سنه لرجه اوغراشه رق ،
صاف ، مقدس قانلری دوکهرک اجدادینک فتح ایله دکلری
یرلری ، کندیسى صرف ادامه استبداد ایچون دشمنلره
تسلیم ایتمش . ملتی قهر و ادبار ایچنده یاشامش ، عثمانلیاق
نامنی سیئات متوالیه سیله لکه دار ایله مشدی . ملت ،
اجدادینک اک محترم لرینه لایق اولدقلری احترامانی

ایفا ایتمش، الظالمترینی ایسه خلع و تدمیرایدهرک اخلاقه
قائل بر نمونه عبرت ابراز ایله میشدی .

عبدالحمیدک بوسوزینه قارشى :

— اجدادیکزدن بر چوغنک مع التأسف دوچار
اولدقلری فلاکتدن سزی تخلیص ایچون بویه یاپیلیور .
جوابی ویرلدى . اوزمان . درین برسکون حاصل اولدى .
حرم قادینلرینه کینمهلری تنیه ایدلدى . دوت آرابه
احضار ایدلمشیدی . عبدالحمید آرابه یه بیندیکی صروده
بیتاب برحاله بولونیوردی . آرابه نك اوکنده و ارقه سنده
قوتلی برسواری مفرزه سی بولونیور ، الك اوکده زرهل
اوتوموبیل حرکت ایدیوردی .

آرابه لر بشکطاش ، طوپخانه طریقله سرکه جی یه
متوجهاً حرکت ایدیوردی . آرابه لرک کچه جکی یوللر
کاملاً عسکرله احطه ایدلمشیدی . عبدالحمید ، شهرک ظلمت
کشیفه سی ایچنده ، صوک جنایتک مجازاتی کوریوردی .
آرابه لر کوپریدن کچه رک سرکه جی یه کلدیکی زمان برصالونلی
واغونله اوچ واغوندن مرکب برقطار عزیمته مهیا بولو .

نیوردی . ساعت ی دی یه کلمه شدی . استاسیون هر طرفدن
عسکرله احاطه اولونمشدی .

عبدالحمید واغونه بینه جکی صروده قادینلره معاونت
ایدیور، صوکره معدن صوبی اولماق اوزره ایچیله جک
صوایستیوردی . استاسیونک تنویرات مشعشعه سی اورته .
سنده ضابطانک پارلاق اونیفورمه لری کورولیوردی .
عبدالحمید کولرنکلی بر جاکت کیمش ، چهره سنده ملال
واندیشه نمایان اولیوردی . عبدالحمید صالونلی واغونه ،
آتی ضابط ایله یکر می نفرده دیگر واغونلره بینه مشلردی .
ترن ، آفرانغه ساعت ایکی یی قرق بش کچه حرکت
ایدیوردی . فقط استاسیونده . شمدی یه قدر هیچ بر زمان
بویله بر ترن حرکت ایتمه مشدی . ترنک حرکتی ائسانده
نه وداعلا شمع ، نه سلاملا شمع ، هیچ بر شی اولیور ،
هیچ بر مراسم ایفا ایدلیور ، هیچ بر باش ، کوزو کیوردی .
ییلدیز مستبدینی حامل اولان بو ترن تیز بر چیغلق
قوپارهرق حرکت ایدیور ، بر هیولای مظلم حالنده
کشیف ، قورقونج ظلمتاره قاریشیوردی . اوزمان ،

قارشیده ، اسکدار ساحلنک ظلمتیر ایچنده قالان
 بر کوشه سنده ، اظهار سرور ایچون یانان فنارلرک نظر
 فریب ، متهز ضیالری مرمردنک قارا کلق طالعہ لری
 اوزرنده تتریشیوردی . . .



3 1761 06981500 9

